

**EIGHTH LEGISLATIVE ASSEMBLY OF MIZORAM
(THIRD SESSION)**

LIST OF BUSINESS

FOR FOURTH SITTING ON MONDAY, THE 17th JUNE, 2019
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu ZORAMTHANGA**, Hon'ble Chief Minister to lay on the Table of the House a copy each of the following :
 - i) The Mizoram Municipalities (Ward Committee and Local Council) (Third Amendment) Rules, 2015.
 - ii) The Mizoram Municipalities (Facilities to Mayor, Deputy Mayor, Chairman, Vice Chairman and Councillors) Rules, 2018.
 - iii) The Mizoram Municipal Appellate Tribunal Rules, 2017.
 - iv) The Mizoram Urban Areas (Land Development, Landslide Prevention and Mitigation) Rules, 2017.
 - v) The Mizoram Street Vendors (Protection of Livelihood and Regulation of Street Vending) Rules, 2017.
 - vi) The Mizoram Real Estate (Regulation and Development) Rules, 2019.
3. **Pu LALDUHOMA**, to lay on the Table of the House a copy of each of the following :
 - i) Statement of Actions taken by the Government on Further Recommendations contained in the 30th Action Taken Report of Public Accounts Committee relating to Health & Family Welfare Department.

- ii) Statement of Action taken on the Further Recommendations of Public Accounts Committee contained in the 31st Action Taken Report, 2018 relating to Transport Department.

FINANCIAL BUSINESS
GENERAL DISCUSSION ON THE BUDGET FOR THE YEAR
2019-2020.

- 5. General Discussion on the Budget for the year 2019-2020 (to commence)

S.R. ZOKHUMA
Commissioner & Secretary

....

SPEAKER : Nang erawh chuan zirтира dik tak nena inhmeh thu sawi rawh.

Tita 2:1

Zawhna leh chhannaah kan kal zui nghal ang a, tunah Starred Question No. 36 na hi mi pahnihinin zawt a, Member zahawm tak Pu Vanlalhlana leh Er. H. Lalzirliana te zawhna a ni a, a senior zawk member zahawm tak Pu Vanlalhlana i lo sawm ang.

PU VANLALHLANA : Ka lawm e, Pu Speaker. Starred Question No. 36-na, Minister zahawm tak Sericulture Department enkawltu chhan atana ka zawhna chu :

- a) Silk pangang vulha eizawng hi Mizoramah eng zat nge awm?
- b) Mizoram hi Silk production-ah potential area niin a lang a, tun dinhmunah eng zat nge kan tharchhuah?
- c) District hrang hranga hmalakna leh farmers ten engtiangin nge hlawkna an dawn ve theih ang tih ka zawt e.

SPEAKER : Chhang turin Dr. K. Beichhua i lo sawm ang.

Dr. K. BEICHHUA, MINISTER : Pu Speaker, member zahawm tak Pu Vanlalhlana leh Pu H. Lalzirlianate zawhna chhanna chu:

- a) Mizoramah Silk pangang vulha eizawng chhungkaw 5651 an awm mek a ni.
- b) Mizoram Silk cocoon production 2018-19 hetiang hi a ni:

Mulberry (Thingtheihmu)	-	43.46MT (43465.95 Kgs.)
-------------------------	---	-------------------------

Muga (Nauthak)	-	188480 Nos.
----------------	---	-------------

Eri (Mutih)	-	0.67MT (665.78 Kgs.)
-------------	---	----------------------

- c) District hrang hranga hmalak dan leh farmers te dinhmun chu hetiang hi a ni:

1. **Mulberry (ISDP hnuaiah)**

a) Lunglei	-	350 Beneficiaries
------------	---	-------------------

b) Serchhip	-	100 Beneficiaries
-------------	---	-------------------

c)	Lawngtlai	-	50 Beneficiaries
d)	Kolasib	-	50 Beneficiaries
e)	Mamit	-	50 Beneficiaries
	TOTAL	-	600 Beneficiaries

2. **INSDP hnuaiah:**

a)	Champhai	-	600 Beneficiarie
b)	Aizawl-		400 Beneficiaries

3. **Muga:**

a)	Aizawl-		100 Beneficiaries
b)	Kolasib	-	140 Beneficiaries
c)	Lunglei	-	60 Beneficiaries
d)	Mamit	-	60 Beneficiaries
e)	Serchhip	-	80 Beneficiaries
f)	Champhai	-	60 Beneficiaries
	TOTAL	-	500 Beneficiaries

SPEAKER : Zawhna 37-naah kan kal ang a, zawt turin Dr. F. Lalnunmawia i lo sawm ang.

Dr F.LALNUNMAWIA : Pu Speaker, ka lawm e. Hon. Minister, DM &R changtu chhan atan ka zawhna chu :

Aizawl chhimlam kawtchhuah Ngaizel lung tla thin hi mipui him zawk nan tha leh mumal zawka hmalak tumna a awm em?

SPEAKER : Chhang turin Minister zahawm tak Pu Lalchamliana i lo sawm ang.

PU LALCHAMLIANA MINISTER : Pu Speaker, member zahawm tak Dr. F. Lalnunmawia zawhna chhanna chu hei hi a ni.

Ngaizel phei lung tla thin ven nan hian Disaster Management & Rehabilitation Department chuan tha leh mumal zawka hmalak tumna a nei mek tih a ni e.

SPEAKER : Zawhbelhna zawt turin a neitu Dr. Lalnunmawia ilo sawm ang.

Dr F. LALNUNMAWIA : Pu Speaker, Ngaizel saw a kawng chung ko saw a hlauhawmin lung tla a awm fo a, a bikin fur lai hian a hlauhawm leh zual a ni. Ruah a sur a, chumi zawh ah nisa in a em leh a, lung kha a lo khi a, lung nawi te kha a lo tla hem hem mai a ni. Helai hmun hi kal tlang an tam si a, lirthei khalhtute chuan motor khalh chungin kawng chhak lam dak chho chung hian an khalh fo a ni. Mihring vanneihna hi a sang em a, chung lamin zah a ngai a, vanduinna hi kan pumpelh leh hlauh thin zawk a, motor delh chhiat te pawh a nei fo a. Ngaizel kham hi kumtluanin mangkhawng hi a ni ringawt mai a ni. Chuvang chuan helai kham phei hi mumal zawka enfiah thin theih a ni ang em tih ka zawt belh duh a.

Tin, hmanni lawkah pawh lung lian em em mai a tla a, nithum lai kawng a block a, thenfai a ni a, a thawktu engineer te pawh kan sawi pui a. DM & R hotute, DPR mumal zawk siama a khat tawka lei tla tur te enchiana then fai thin theih ni se tih kha kan rawt a. Tin, engineer te pawh a remchang laiah he mi wire mesh hi zar theih a ni ang em tih te ka lo zawt a. Kha tiang kha a remchang laiah tih theih ni se chung lamah kilh tanin zar thla duai mai ila, lung te pawh kut tum tia te chu a lo tlakin kawng chhak hrulah khan a tla thla ang a a hlauhawm nep deuh tih kha kan ngaihtuah a. Chutiang bawkin Thakthing kham phei te pawh a ni a, silpaulin mai ni lo, silpaulin hnuaiyah hian wire mesh phah ta ila mihring tan pawh a him deuh ang a tih pawh ngaihtuahna ka lo seng ve thin a. Chutiang chuan Department DM & R leh PWD-a kan hotu te pawh hian DPR mumal zawk siama hma min lak sak theih dan awm se, chu chu min ngaihtuah sak thei ang em tih ka zawh belh a.

Tin, Hmuifangtlang Midumkham chho pawh saw lung a tla fo a, khualzin an ralti em em thin a, a khat tawkin survey te neiha hetiang lama mithiamte kham lawn tira then fai thin theih a ni em tih kha ka zawhbelhna a ni e. Ka lawm e.

SPEAKER : An phar rual a, opposition lam ka'n duhsak ang e, member zahawm tak Pu Lalchhuanthanga i lo sawm ang.

PU LALCHHUANTHANGA : Pu Speaker, ka lawm e. Tuna zawhna hi ka bial chhung ami a ni a, a ngaihpaawimawhawm khawp mai a, tunlaih adventure club te a lo ding a, hengho te hi hman tangkaia sawnglaia lung tla lek lek awmte saw thenfai dan a awm lawm ni ka ti a ni.

SPEAKER : Member zahawm tak Dr. Vanlaltanpuia i lo sawm ang.

Dr. VANLALTANPUIA : Pu Speaker, ka lawm e. Ka zawhbelhna chu Zotlang Tourist Lodge hmuna lei tlahniam nasa em em hi disaster fund atangin pawisa dah a awm em tih leh Mualthuam North Football Field-ah lei tlahniam nasa tak a awm bawk a, hei hi ATL Road, Aizawl - Thenzawl - Lunglei road-a awm a ni a. Hei hi vawilekhkhat a min in a hnawh thlak vak phei chuan Mizoram chhimlam kawngpui pawimawh tak mai Siaha District te, Lawngtlai District te leh Chakma Autonomous District Council zawng zawngin an rin kawngpui hi a ping mai dawn a. Hei hi Mizoram chak lakna kawngpui pawimawh tak a nih avangin hei hi min dah sak thei em tih ka zawt a.

Tin, Disaster Response Vehicle fully equipped Aizawl-a kan neih ang hi district tinah te hian min pe ve thei em tih kha ka zawt tel bawk a. Tin, khuarel chhiatna rial tla te leh tunhnaiah thlipuiin a tihchhiat ho te kan nei nual a, heng ho hi State Disaster Management Authority lam ten hma an la a, amaherawhchu fund te hi a thleng har thei ang reng hle mai a. Hengte hi rang deuha pek dan a awm em ? Mi inchung pawp vek tawh te kha silpauline te kan han pe thei chauh kha a ni a, rangva leh tanpuina awm thei ang ang chi te kha a rei thei lutuk a, helai hi Pu Speaker, a rang lama pek theih dan a awm em tih te a ni a.

A dawt lehah chuan hnunglamah hian zawhna hi ka nei tho va, a chhuah tawh loh palh takin am deuh hlekin kan zawt ang a. In thiah ngai te a lo awm thin a, Aizawl-ah te pawh lei a han min a, chumite in chu thiah a ngai a ti te in an identify thin a, in thiahna fund te hi a awm si lova, thiah

man a to thei em em lawi a. Hengte hi State Disaster Mitigation Fund atangte hian dah theih dan a awm em tih ka zawt bawk e. Ka lawm e.

SPEAKER : Aw le, chhang turin Minister zahawm tak kan sawm ang a. A karkik deuh a nih pawhin a theih ang anga chhang turin i lo sawm ang.

Pu LALCHAMLIANA, MINISTER : Pu Speaker, zawhna neituin a zawhbelhna kha han dah hmasa ta ila. Ngaizel phei saw kan hriat theuh angin engemaw chang hian kawng chhak ko atang sawn a rawn tla leh hlawl thin a, vanneihthlak deuhin nunna chan erawh chu kan la awm lova, a lawmawm khawp mai.

Nikum 26 July khan sorkar hmasa khan study team chu an lo siam tawh a. Amaherawhchu, District Disaster Management Authority D.C Office atanga din hi an lo tel lova. Tin, a huamchhung V/C te leh NGOs te pawh an lo tel lova, churang chuan a famkim tawk lova. Amaherawhchu, hna pangngai tak thawkin hmun 7 laiah kawngchhak atanga lung lum maithei dinhmuna ding a awm a ni tih an hmuchhuak a. Amaherawhchu, a famkim loh deuh avang khan famkim deuh zawka project detail deuh zawk te pawh siam thei tur committee din ni sela an ti a, hei hi tunah hian kalpui mek a ni a.

Chutih rual chuan kumin 22nd May khan PWD Engineer-in-Chief te, Director DM&R te, Geology & Mining amite ho khan a hmunah tlawhin DPR mumal zawk siam a ngai a ni an ti a. Chutiang chuan sawlai hmun saw enfiah chiana DPR tha tak siam tum mek a ni.

Aizawl South-II member zahawm tak sawi kha sawtiang enfiah tur sawn adventure club te hman ni ta se a tha viau lawm ni tih kha suggestion tha tak a ni a, heta DPR siamtu, siam mek te ho hian hman tangkai dan an thiam turah i ngai ang. Tin, wiremesh chungchang, hman a tha ang em tih te pawh kha DPR siamtute khan an rawn rawtchhuah turah ngai ta ila. Chutih rual chuan Midumkham pawh saw a hlauhawm khawp mai a, Durtlang kham te pawh khi a ni tho mai. Hun rei tak chung lung tla lovin a awm a, mahse tunhnaiah hian a rawn tla tan ta tlat mai a, khingte pawh khi mihring

tan a hlauhawm thei a ni tih kan hre tlang theuh awm e. Chuvangin kham hrang hrang, kham hlauhawm thei te hi Disaster Mangement-a a khawih tu tak tak D.C te leh a hmanruate hian identify thei se thain ka hria a. Chutiang bawk chuan kan Director, DM&R hian luidungah mihring tlak tamna lai deuh bik hi identify in signboard te, fimkhur tura hriattirna siam ni se an ti a, rawtna tha tak a niin ka hria a. Chutiang chuan fimkhurna tur hmunte hi signboard tha tak takte hi siam ni thei sela a tha khawp ang.

Tin, Thakthing kham phehi hi a kal chuan kan hre theuh mai a, a hlauhawm khawp mai a sawlama chengte tan phehi chuan, hei hi UD&PA nen te pawh la ngaihtuah tlan chi niin ka ring.

Tin, Lunglei North bialtu zahawm tak Dr. Vanlaltanpuia zawhna kha Tourist Lodge bul Zotlang lei tla hniam siam tumna a awm em tih kha ka hriat chinah chuan a la awm lo. Amaherawhchu, Mualthuam North khawchhung lei tlahniam erawh saw chu mitigation fund atangin siam tum a ni a. Nikuma nuai 996 kan dil kha min pe hman ta lova nikum chhungin, kumin kumtharah hian kan han dil leh a, nuai 386 chauh min pe thei a. Chuvang chuan duhthusam chuan Mualthuam North bul pawh saw kan siam thei lovang a. Tun dinhmunah chuan nuai 30-a bul tan phawt ni se tih a ni a, sanction kan nghak mek a ni.

Tin, disaster response vehicle district tinah dah ni ve se tih hi a tha khawp mai a, amaherawhchu tun dinhmunah chuan kan dah thei rih lo a ni. Rial tla, khua rel chhhiatnaah hian a chhawmdawl na tak hi a muang khawp mai a ti a, a dik ang. Chhawmdawl vatna ka tih theih tawk hi chu silpouline hi a ni mai a, chu lah chu court case a awm a, tunah hian kan lei thei lo lehngal. Directorate atangin mamawh zualpui a awm takin tih thua DC ho hi a bata bat kan phal ringawt mai a, a rate tukin an bat zat tur nen. Mamawh zualpuiah chuan chu chuan a chhan thei turah kan ngai a.

Tin, concrete taka han tihna tur chuan rangva te leilawk a nih loh phehi chuan sorkar chezia hi a muang hrim hrim a, file pakhat hian dawhkan 7/8 te, a chang phehi chuan 10 te a kal tlang a ni a. Chuvang chuan rang taka chet hi duh mah ila sorkar kalphung hrim hrimah hian a theih loh chin hi a awm a ni tih kha min hriat sak ka duh a ni.

Tin, in hlauhawm thiahna fund hi mitigation fund atang hian a tih theih em a ti a, kan la enchhin lo a. State disaster response fund atang hi chuan official hoin an han zirchianin a lo tih theih lova, guidelines-ah khan an lo telh lo a ni nghe nghe a, a buaithlak khawp mai. Kan hriat angin Hunthar vengah Pi Sairengi in thiah a ngai a. Chu pawh chu core committee-in thiah mai ni se an ti a, SDRF pawisa in kan official-te sawi dan chuan hei pawh hi audit hmachhawn nan chuan kan huphurh khawp mai an ti a. Mahse nuai 16 sengin thiah a lo ni tawh a. Khatiang kha thil awm dan a nih avangin a harsa khawp mai. Mitigation fund atang hian tih theih dan a awm em tih pawh hi la enchian chi a ni ang. Kha kha Pu Speaker, ka chhan theihna tawh a ni e.

SPEAKER : Starred Question 38-na zawt turin member zahawm tak Dr. ZR Thiamsanga i lo sawm ang.

Dr. ZR THIAMSANGA : Pu Speaker ka lawm e, Horticulture Minister zahawm tak kan Chief Minister zahawm tak ni bawh chhan atan ka zawhna chu : Champhai Sub-Divisional Horticulture Office khi Division puitlinga hlan kai tumna a awm em tih a ni.

SPEAKER : Chhang turin a changtu Minister zahawm tak Chief Minister Pu Zoramthanga i lo sawm ang.

PU ZORAMTHANGA, CHIEF MINISTER : Pu Speaker, a chhanna chu: Department lam atang chuan sorkar-ah rawtna thlen a ni a, chhanna nghah mek a ni.

SPEAKER : Pu Lalrintluanga Sailo, member zahawm tak i lo sawm ang.

PU LALRINTLUANGA SAILO : Pu Speaker, ka zawhbelhna chu hei hi a ni. Horticulture Divisional Office Tuidam-a awm hi district headquarters Mamit-ah sawn tumna a awm em tih a ni a, a chhan han sawifiah lawk ka duh a. District Office tin hi chu, head of office hi chu a tlangpuiin district headquarter-ah an awm a, keini district chhunga Horticulture Divisional Office hi chu Tuidam-ah a awm daih mai a. Keini bial ang tan chuan pan a buaithlak em em mai a, kan Sub-division lah hi Rawpuichhip-ah a awm hlauh mai bawh a. Civil Sub-divisional administration awm lohna ve ve-ah hian Horticulture divisional leh sub-divisional hi a awm a. Helai hi

min tihdanglam sak thei em? Entirnan ka bial chhunga civil sub-division senior West Phaileng-ah hian SDHO office te hi min hawn sak mai thei em tih ka zawt e.

SPEAKER : Member zahawm tak Pu Lalduhoma i lo sawm ang.

PU LALDUHOMA : Pu Speaker, zawhnaah hian vawiinah hian a awm tho a, mahse kan thlen hman ka ring lova, a chhangtu tur a rawn inbuatsaih tho ka ring a. Thenzawl-ah sawn Horticulture College sak mek a awm a, a hmunahte kalin kan en vek tawh a, Mizoram kan neih chhun tur pawimawh tak mai a ni a.

A hmun kan fan ni chuan Horticulture department atangin officer fel tak mai hian min kaihrui a, contractor te ai mah mah khan engkim min hrilh thei a. Tichuan session hmasa khan zawhna ka zawt a, physical achievement te, financial achievement te engzahnge ni tawh? Second phase hi engtiang tih tur nge, engtikah nge class an tan dawn tih vel neuh neuh kha ka zawt a. Ka chhanna dawn chu 'he college hi central agriculture college Imphal hnuiaia awm a ni a, engmah kan hre ve lo, contractor hming pawh kan hre ve lo, tih a ni. A beidawnthlak ka ti khawp mai a, Horticulture Department-in Horticulture College lo ding tur engmah an han chhang thei lo kha he House zahlohna pawh hi a tlingin ka hria a.

A hmunah an officer a awm a, thil a hriain a fel em em a, khatiang zawnga inchhan kha a tha lo ka tiin tunhnuah fimkhur ni tawh se, chu chu tuna a dinhmun khang ho kha ka'n zawt nawn leh a ni. Physical achievement te, financial achievement te, contractor hming te, second phase kalpui an tum dan te, engtikahnge a vaia zawh a nih ang tih te nen.

SPEAKER : Hemi zawhna neitu kha i phar tlai lutuk a, engtinngge kan tih ang aw? Dr. Vanlalhlana a phar ngun riau mai, sawm phawt ang.

Dr.VANLALTHLANA : Pu Speaker, ka lawm e. Horticulture department changtu Minister zahawm tak chhan atan: Ramhlun Market Ramhlun North-a awmah sawn Horticulture department enkawl niawm tak Anthurium Grower Association hovin office an nei a, Ramhlun market bulah sawn kawngsirah chawhmeh an zuar a, hei hi khawtlang hruaitute pawhin an ngawimawh khawp mai a. Market-ah hian dah ngei an duh a, mahse sawlai market saw a hmian an lo luah that loh deuh vangte pawh a ni ang Anthurium ho sawn office-ah an rawn hmang tlat mai a. Hei hi a changtu Minister hian min enpui sela, ruahmanna dang min lo siam

sak thei ang em le, kawngsira chawhmeh zuar ho hi sengluh kan duh deuh a ni ka rawn ti a nih chu.

SPEAKER : Zawhna neitu kha dan a bawhchhe dawn, office-ah i zawt mai dawn em ni? Chief Minister hian phal mai sela office-ah zawt mai teh a! Kan dan siam hi kan bawhchhiat chuan, a phar tlai tlat mai a. Min ngaithiam teh. Chhang turin Chief Minister zahawm tak i lo sawm ang. Chief Minister khan office-ah lo leng mai rawh se ti se a tha mai lawm ni?

PU ZORAMTHANGA, CHIEF MINISTER : Ni mai e, Speaker-in a tihte chuan thu kan awi tlan a ngai si alawm.

Pu Speaker, member zahawm tak Pu Rintluanga zawh 'Tuidam-a Divisional Horticulture Office awm kha a District Headquarter, Mamit lamah a awm mang bawk si lo va, sub-division lamah te a awm mang bawk si lo va' a ti a. Nia, a tlangpuia han tih danah hi chuan District Headquarter-ah hian department, khami District chhunga a lian deuh ber Office kha chu a awm tlangpui a, khatianga awmlo te pawh kha a awm ve thin a. Engpawhnise, heng hi kan lo enzui ang a, engtia han tih chi nge ni. A chhan chu, an hna a zirin PWD pawh District Headquarter-ah chutianga liana awm tura ngaih kha a awm a nih deuh ber laiin, road project a zirin SE thuthmun tur te, EE thuthmun turte pawh a hna tamna laiah khan dah tul tiin dah tawh thin a ni a.

Engpawhnise, tunhma atangin Tuidam ami hi lo dah a ni a, han sawn hi a remchang em, remchang lo em, kan lo en ang a, chu chu kan lo thlir ang a, chutiang bawkin sub-division te pawh kha a remchang em. A tlangpui thuin District Headquarter-ah Department Office lian ber a awm hi chu a hmeh chu a inhme a, a rem pawh a rem khawp mai a, amaherawhchu chutiang ni lovin, a awmna hi Mamit District pian hma a ni maw? Khatiang kha a ni si a. Chuvangin, Mamit District pian hmain an lo dah daih tawh bawk si a, hna tamna tur ni a hria in. Engpawhnise, engtia siksawi rem chi nge tih lai chu a en pawh kan lo en zel ang a, a remchan leh remchan loh. Civil Sub-Division Headquarter lama Horticulture Department Division Headquarter awm pawh kha a remchang em tih kan lo enzui zel ang e.

Tin, member zahawm tak Pu Duhoma zawhna kha a dik khawp a, zawhna lo kalah hei hi Imphal lam enkawl a nih avangin engmah min hrih si lo va, kan hriat

lohin an ti tih kha chhanna turah pawh file-ah a lo kal thin a. 'A theih ang chin chin zawt rawh u, hemi chu hriat theih ang chin chin zawh tur a ni,' ka ti a, file ka returned a. A then chu nakin zawhna dang lo kalah pawh chumi ang chuan an theih ang chin chin chhanna pawh an rawn la a. Chutilo chu kan enkawl a ni lo va, kan hre lo tih ngawt kha a fel lo va. Chuvangin, helai hi Department lam pawh telephone pawhin a inbiak theih a tunlai hunah, contractor hming te, an achievement chin tal chu lo zawt rawh u ka ti a, tunah hian file-ah kan in returned a, kan inbe mek a ni e. Chu chu nakinah chiang zawk pawhin kan rawn sawi theiin ka ring.

Tin, Dr. Vanlalhlana zawhna Ramhlun Market chungchang kha ita rawn dil, rawn sawi kha an tam khawp a. Aizawl North College lam pawhin hman tangkai theih dan zawk a awm ang an rawn ti a. Anthurium ringawtin an hman hi chu a dik lo, an ti a. Hei hi chu mipui market a ni a, market angin a tlang tur a ni tih ngaihdan a awm bawk a. Chuvangin, khalai kha a remchang dan ber kan rawn en ang a, mipui market hi chumi atan siam a nih ang chuan a lal ber tur niah ka ngai a. A dang kha chu tunhmain arrangement a tul tia an lo siam nachhan te kan han enpui ang a. Engpawhnise, ka ngaihtuahnaah chuan mipui market hian a mamawh a nih chuan, chumi atana siam chu a lal tur a ni a, department dang chuan anmahni in remchang dang an ngaihtuah mai tur a ni tih kha ka sawi duh bawk a.

Tin, chulovah chuan, a tlangpuia ka sawi duh chu heng zawhna thenkhat lo kalah pawh Champhai lamah khian Horticulture Headquarter han sawn chhohna tur lai khi ngaihtuahna a awm em tih a tira zawhnaah pawh khan, department lam chuan division puitlinga hlankai tha an ti a, rawt pawh an rawt a. Amaherawhchu, kan hriat angin tunah kan pawisa hman tur budget pawh kan la pass lova, khata khawilai ami emaw hlankai tur a awm leh awm loh kha han sawi nghal hleihtheih pawh a ni lo a. An tih ang deuhin, vawk kan vawthlu chauh a, chawthleng nen, chaw nena lo thawh nghal ringawt hleihtheih pawh a ni lo, a rawh te, a chan te, a chhum te a la ngai a, kan la vawthlu mumal lo a nia, kan budget pheih chu pakhatmah kan la pass lova. Tin, Code of Conduct kha May thla tawpah a tawp a, June pawh kar hnih emaw kan hmang chauh a ni a. Kan vawthlu zo pawh a la ni lo va, chuvangin duh angin khalai kha chiang zawkin kan la chhang kim thei lo va, kha kha min han hriatthiam pawh ka duh a. A tul ang erawh chu member ten suggestion min pe ula, a tihdan tur kawng tha kan lo ngaihtuah zel dawn nia.

SPEAKER : Starred Question No. 39-na zawt turin member zahawm tak Pu C. Lalmuanpuia kan sawm e.

Pu C. LALMUANPUIA : Pu Speaker, Disaster Management & Rehabilitation Department Minister zahawm tak chhan turin:

- (a) Hunthar Veng lei tlahniam thin hi sorkarin tihdam tak tak a tum em?
- (b) Tum ta se, engtika hna tan nge a tum tih ka zawt e.

SPEAKER : Chhang turin Minister zahawm tak Pu Lalchamliana i lo sawm ang.

Pu LALCHAMLIANA, MINISTER : Pu Speaker, member zahawm tak Pu C. Lalmuanpuia zawhna hi lei tlahniam damlo tihdam tumna a awm em tih a ni, a pui angreng khawp mai a, a tawngkam hman hi. A chhanna chu ‘tum e’ tih a ni.

(b) Hemi atan hian Detailed Project Report central-ah thehluh tawh a ni a. National Disaster Management Agency-in 2nd May, 2019 khan chu project chu min pawmpui tawh a, sanction hmuh veleh hna tan a ni ang.

SPEAKER : A zawhna neitu a tawpnaah ka’n dah ve ang e aw. Member zahawm tak Pu Vanlalhlana.

Pu VANLALHLANA : Pu Speaker, Ngaizel kham zawh lai khan Durtlang kham sawi kha ka duh a. Hunthar lei tlahniamah a la awm e i ti si a, Hunthar lei tlahniam sawi laiin Durtlang kham ka’n zawt dawn thung a nih chu. Nichinah khan Minister zahawm tak khan correction kha a rawn nei nual tawh a. Durtlang kham khi hmannah lung a lum a, motor-te a deng a, nunna erawh chu chan an awm lo va, hei fur a ni dawn a, a hlauhawm dawn chauh mai a, chuvangin, kan Minister hian min hriatsak se, en se, lei tla mai thei tur te, lung tla mai thei tur te, lei laih vung te a awm a, mipui him leh zual nan leh chhiatna a thlen hmain min enfihsak teh se tih kha ka zawt duh a ni.

SPEAKER : Dr. Z.R.Thiamsanga i lo sawm ang.

Dr. ZR. THIAM SANGA : Pu Speaker, ka lawm e. Nichinah ka zawh belhna hunah khan a chang ta lo a, engpawhnise, Chief Minister zahawm tak zawh theihna chance min pe a, a lawmawm khawp mai.

Hunthar lei tlahniam hi kum tam tak kan lo buaipui tawh hetiang a sorkar-in chak tak maia hma a la hi a lawmawm khawpin ka hria a, kan sorkar thar hi lawmthu sawi mawlh mawlh na tlak a niin ka hria a, tunah pawh khan hma an lo lak tawh dan te, tum dan te kan hria a, a lawmawm hle a ni.

Chutihruala ka zawh duh chu Thakthing kham saw Minister zahawm tak khan a rawn sawi tawh a, saw saw khawpui laili a ni a, englai pawha motor tlan reng a ni a, a chep si a; tin, sawlai ah sawn mau te, thing te an zuar a, a hlauhawm khawp mai a, a ti tawp baw k a, sawtiang kham mawi lo lutuk mai saw han chei ta ila khawpui mawi tak siam theihna a ni baw k si a, chuvangin, saw saw a rang thei ang in kan sorkar hian hma min laksak thei ang em tih kha ka rawn zawt belh a ni e. Ka lawm e.

SPEAKER : A pathum nan zawhna neitu member zahawm tak Pu C.Lalmuanpuia i lo sawm ang.

Pu C. LALMUANPUIA : Pu Speaker, Hunthar Veng lei tlahniam hi a rei tawh khawp mai a, nichinah a changtu Minister zahawm takin a rawn sawi ang khan natna ang deuhte khan ka rawn zawt a ni. A awm viau tawh a, kum 1992 atang tawh in he lei che hi kan buaipui tawh a ni a. Tin, a chet zual deuh phe chu kum 2015 kha a ni a, a veiawm em em a. Aizawl mai ni lo, Mizoram kawtchhuah pawimawh, kan ei leh bar lakluhna pawimawh tak mai a ni a. Tin, Hunthar Veng mipui ten an tuar nasa em em a, in leh lo an chan a, nikum maiah pawh Pi B.Sairengpui in thlengin kawngpui chhak lam thlenga che thei turin a rawn min tawh a ni a, kal zel phe se chuan Chief Minister Bungalow thlenga hlauhawm thei tur ni a sawi niin ka hria a. A pawimawh em avangin damlo ang deuhin ka chan a, kum 27 vel a nih avangin ka zawhna pawh kha khatiang zawng khan ka rawn ti a ni a.

Disaster Management Minister-in min ngaih pawimawh sak a, rilru tak tak a han seng a, chu mai ni lovin Chief Minister hian a tak takin min ngaihtuah a, Official-te leh Consultant-te tir mai lovin amah ngeiin Delhi-ah a nak min zen sak a, a hmunah ngei min sawi sak avangin DPR-te pawh kha a rawn chhuak niin ka hria a,

Aizawl North-III mipui aiawh leh Hunthar Veng khawtlang aiawhin lawmthu ka sawi a, ka zawh belhna chu heihi a ni e, Pu Speaker. DPR a chhuak a, furin min nang leh mai dawn si a, tunah hian kan sorkar hian engtin nge hma a lak mek? A lak dawna DPR leh sanction inkar lai te kha khawngaihlin ka rawn zawt leh a ni e. Ka lawm e.

SPEAKER : Chhang turin Minister kan sawm ang a, zawh belhna kha ti tawh lovang. A chhan chu tun atanga 25 minutes-ah hian General discussion kan nei dawn a, kan ngaihpaawimawh chuan tah khan a leng leh dawn tho a nia.

Chhang turin Minister zahawm tak i lo sawm ang.

PU LALCHAMLIANA, MINISTER : Pu Speaker, Aizawl North-I bialtu member zahawm tak khan Minister hian en se a ti a, ka en hi chu a sawt vak chu ka ring lo va, amaherawhchu, kan mi thiamte a hmuna en turin thurawn lo pe ila a that ka ring a, ka en hrim hrim kha a duh chuan amah nen pawh hian remchangah Durtlang kham velah chuan han hawi vel ila a tha tho in ka ring.

Nichinah khan zawhbelhnaah khan a awm tawh a, Thakthing kham saw a hlauhawm khawp mai a,ka sawi tawh ang khan Urban Development lam te nen ngaihtuahna dahkhawma hma lak chi niin ka ring.

Tin, zawhna neituin a zawh kha ka sawi tawh ang khan sorkar hmalakna hi a chak thei lo khawp a, khulai siam that nan khuan sorkar hmasa hunlai atang khan an lo bei tawh a, 2016-ah AIE Consultancy an tih hi DPR an siam tir tawh a, amaherawhchu, a bawhzuina kha a tha lo nge ni kha project kha an approve ta lo vang vang a. Kumin kumtira Chief Minister zahawm tak Delhi zuk zin khan remchang la in National Disaster Management Authority hruaitute a zuk hmu a. Chief Minister meuhin khatiang a zuk tih tak chuan kha project endiktu, expert an tihte kha kar khat chhungin an rawn tir chho a, a hmunah an rawn en ta a. Chu chuan Mizoram sorkar aiawha Detail Project Report lo siam kha a tul ang angin an modify ta a, May thla tir khan kan Project Report chu min pawmpui ta a, a vai chuan 20 crore chuang hret tur a ni a, NDMA-in a tum theih hi 15 crore a ni a, a bak 5 crore leh tlem kha chu state sorkarin a tum ve tur a ni. Sanction erawh chu a la chhuak lo va, tunah hian fur a lo ni tan tawh si a, engtin nge kan tih ang tia kan han inrawn

khan expert- ho chuan Core Committee din rawh u, an ti a. Core Committee chu kan Commissioner DM&R hovin siam a ni a, PWD te, Geology te telin.

Tichuan, tunah khuan a chirhdiak kha chu thenfai thawkhat a ni tawh a, silpoulin-in tun tum chu i khuh phawt mai teh ang, a min zel loh nan tih a ni a, an la khuh zo lo deuh a, chutiang chuan fur ah a min loh theih beiseiin hma lak a ni tih ka han sawi kai lawk a ni e. Ka lawm e.

SPEAKER : Ni e, Hunthar leimin khu kan buaipuina a rei tawh a, project hi lian leih lawihin siam teh u a, a kawr thlang lam atang khuan hnawh hmawk mai ula a tha mai lawm ni?

SPEAKER : Zawhna 40-na kan kal ang. Member zahawm tak Pu V.L.Zaithanzama Starred Question 40-na zawt turin i lo sawm ang.

PU V.L.ZAITHANZAMA : Pu Speaker, ka lawm e. Art & Culture Minister zahawm tak chhan atana ka zawhna te chu:

- (a) Mizoram hian sorkar laipui atangin Kut/Festival atan sum dawn a nei thin em?
- (b) Sum dawn a nih chuan eng Kut/Festival hmanna atan nge tih leh kum khata a dawn zat min hrilh thei em?
- (c) Chapchar Kut hi tun aia uar leh mipui kokim zawka tel theihna turin ruahmanna a siam theih em?

SPEAKER : Chhang turin Minister zahawm tak Pu R.Lalzirliana i lo sawm ang.

PU R.LALZIRLIANA : Pu Speaker, member zahawm tak Pu V.L.Zaithanzama zawhna chhanna chu:

- (a) Mizoram hian sorkar laipui atangin kKut/Festival atan sum dawn kan nei thin lo.
- (b) Sorkar laipui atangin Art & Culture Department hian a hranpain sum dawn a neih thin loh avangin chhanna a awm thei lo a ni
- (c) Chapchar Kut hi Organising Committee rel dan anga hman thin a ni a. Tun aia uar leh kokim zawka mipuite tel theihna turin ruahmanna hi siam theih tura ngaih a ni.

SPEAKER : Zawhbelhna zawhna neitu member zahawm tak Pu V.L.Zaithanzama i lo sawm ang.

PU V.L.ZAITHANZAMA : Pu Speaker, ka lawm e. Chapchar Kut hi Lammual a kan hman thin hian nasa takin traffic a jam thin a, emergency-ah damlo te tan pawh tihngaihna awm lo khawpin kan buai thin tih kan hre vek a. Chuvang chuan kan la hmang zel dawn hmel si a, Nagaland-a Hornbill festival ang deuh hian khawi hmunah emaw sorkar hian hmun ruahman theih dan a awm em tih ka zawhbelh a. Chutah chuan Chapchar Kut kher lo pawh function dangte pawh neih theihna hmun hi kan mamawh niin ka hria a. Chutiang chu kan siam thei em? Tuna kan hmanna hmun hi chu ram dang atanga min rawn hmanpuitute tan pawh a buaithlakin a zahthlakin a lang a. Hmun dang sorkarin min ruahman sak thei em tih kha ka zawhbelh a ni e.

SPEAKER : Pu H.Thangliana, member zahawm tak sawm ang.

PU ANDREW H. THANGLIANA : Pu Speaker, ka lawm e. Central atang hian main event hetiang festival assistance, central assistance a awm niin kan hre deuh a. Nichina Hornbill festival te pawh kha Nagaland chuan an thlang niawma hriatna ka nei a, specific takin ka sawi thei lova. Tin, Mizoramah pawh festival 2/3 thlang tura tih kan ni deuha hriatna ka nei a. Ka zawh duh tak chu Art & Culture Department hnuaiyah hian Music & Fine Arts hi kalpui a la ni em tih a ni a. Kalpui a la nih chuan chumi atana instruments leh zirna hmanrua chi hrang hrang dah belh emaw tih changtlun leh zual tumna a awm em tih a ni.

SPEAKER : Chhang turin Minister zahawm tak i lo sawm ang.

PU R. LALZIRLIANA, MINISTER : Pu Speaker, ka lawm e. Zawhna neitu member zahawm tak Pu V.L. Zaithanzama khan rawtna tha tak a rawn siamin ka hria a, khatiang kha a dik a. Aizawl khaw lailiah mipui kan han ko khawm a, kan tam thei si a, traffic jam a tam a, hei hian damlo leh harsatna neite mi a ti buai thin khawp mai. Amaherawhchu, he lai hi chu hmun dang remchang kan la neih si loh avangin han sawnna mai tur hi kan hre rih lo a ni. Hetia han ngaihtuah maia tih theih tur ni ta se chuan Aizawl khawpui chhungah chuan a Department neitu, kan Chief Minister te hian lo haw lo se la Horti. Deptt. hmun Chite lui ruam, khu lai khu zau em em mai lei hnawhkhah tur leh laih tur a awm a, khu lai khu mipui tan chuan siam

thei ila chuan, he tah Dawrpui atangin Chhinga Veng chhukah kawng a kal a, Bethlehem Veng atangin kalpawhna a awm a, World Bank Road atangin a pawhna a awm bawk a, Zemabawk atangin a pawhna a awm bawk a, Electric Veng lam atang pawhin lei dawh kai a ni tawh a. Chutiang chuan khu lai hmun khu ui lovin siam thei ila chu a tha ngawt ang, chu chu rawtna kan siam ve zawk mah mah a. Kan vai hian nawr ta ila, kan ram tana thil tha tak tur ni awm takah ka ngai a ni.

Tin, Pu Andrew-a zawhna kha, a hriat dan a sawi a ni mai a, a dikna a awm mai thei a. NEC atang te hi chuan eng eng emaw dil belh dan te chu a awm thei ang a, mahse, kan la hmu chiah lova Central atang hi chuan hetiang puipunna velah hi chuan Tourism Department te chuan an hmu thinin ka hria a. Tin, a zawhna pakhat instrument, Music & Fine Arts hi kan zaimi hote pawh hian an rawn sawi ngun khawp mai a, heng hi tih nun leh a, kan Mizo zai te pawh hi tun aia uar deuh zawka han tih leh te pawh kan chak khawp mai a, sum hi nei thei ila chuan hengte hi kan ngaih pawimawh tak te a ni tih kha ka chhanna ni mai se.

SPEAKER : Starred Question No. 41-na zawt turin Er. H. Lalzirliana, member zahawm tak kan sawm e.

PU H. LALZIRLIANA : Pu Speaker, ka lawm e. Ka zawhna a thleng lo fo thin a, a thlen loh leh mai ka hlau deuh hlek a. Ka lawm khawp mai. Starred Question No. 41-na, Home Minister chhan atan:

Rajiv Nagar-ah hian Police Outpost dah theih a ni ang em?

SPEAKER : Chhang turin a changtu Minister zahawm tak Pu Lalchamliana i lo sawm ang.

PU LALCHAMLIANA, MINISTER : Pu Speaker, member zahawm tak Pu H. Lalzirliana zawhna chhanna chu hetiang hi a ni e:

Tun dinhmunah Rajiv Nagar-ah hian Police Outpost dah theih a ni rih lo tih a ni.

SPEAKER : Khawthlang lam i kal ang aw. Pu Lalrintluanga Sailo i lo sawm ang.

PU LALRINTLUANGA SAILO : Pu Speaker, ka lawm e. Home Minister zahawm tak chhan atan:

Reiek BDO area chhungah hian Police Station/Out Post dah tumna a awm em tih ka zawhna Starred Question 53-na ami kha a chhuak dawn lo in ka hria a, ka'n zawt duh a. A chhan chu West Phaileng Police Station hian a cover hi a zau em em mai a, South Sabual a thleng a. Tunlaih crime a tam em em tawh laiah South Sabual te, Darlung lamah crime a awmin Kulikawn Police Station lamah kan han sawi thin a. West Phaileng lamah min refer lo thei lova. Thil ho ve angreng deuh hlek case a nih pawhin a buaithlak em em mai a. Helai hi Home Minister zahawm tak hian hma min laksak thei ang em tih ka zawt duh a ni e.

SPEAKER : Member zahawm tak Dr. Vanlalhlana i lo sawm ang.

Dr. VANLALHLANA : Pu Speaker, ka lawm e. Zawhna dawt chiah zawhbelhnaa han hman awm tak a ni a amaherawhchu hunin a daih dawn nge ka hre tawh bik si lova, ka zawhbelh dawn a ni.

Nikum lamah khan kan Minister pahnihte hian thu inchuh kha an lo nei tawh a, pakhatin foreigner kan neilo a ti a, pakhatin foreigner an awm reng a lawm an lo ti tawh a. Chu chu a khawi zawk nge ni ta ang a hriat loh a. Minister chhan atan tun dinhmunah hian Mizoramah foreigner, tourist ni lo kan nei em? Engzatnge chhinchhiah an nih tawh? An awm a nih chuan khawi atanga lo kal nge tih kha ka zawhbelh duh a ni e.

SPEAKER : Zawtbelh turin zawhna neitu Pu H. Lalzirliana kan sawm anga, a tawpna a ni ang.

Er. H. LALZIRLIANA : Pu Speaker, ka zawhbelhna Rajiv Nagar ka'n tih kher kher nachhan hi tam takin Mizoram khua a ni em ni ti te pawh kan lo awm mai thei a, a topography leh geographical hi a hre chianglo tan chuan a hriat loh ve theih khawp mai a. Tripura border a ni a, helai khua hi Chakma area a ni a, khua 3/4 vel lian deuh deuh a awm ve a. Rajiv Nagar phei chu in 1000 dawn awmna khua a ni. Chu chu Tripura state border a ni a. Helai ruam hrim hrimah hian mi leh sa tam tak a bik takin Bru leh Chakma an awm a. Tin, state boundary border a lo ni bawken helai hmunah hian harsatna neuh neuh kan tawng ve fo a.

Tin, chu mai piahlahmah chuan thil dang hrang hrang, department dang pawh han ko lut dawn ila, security a awm em tih hi zawhna a ni fo a ni. Banker-te pawh han ko lut dawn ila security lam kha an ngaipawimawh lo thei lova. Chuvang chuan

a pawimawhna lai kha min hriat sak turin kan Minister pawh ka chah duh a. Helai takah a theih loh a nih pawhin helai khua bawr vel khawi emaw takah hi chuan tih theih dan a awm em? Tuipuibari emaw, Damparengpui te pawh khu khaw lian tak a ni a, hengah hian a la awm lo vek a ni. Chungah chuan tih hram theih dan a awm em, min ngaihtuah sak thei ang em tih kha ka zawhbelhna a ni e. Ka lawm e.

SPEAKER : A theih ang anga chhang turin Home Minister zahawm tak Pu Lalchamliaana i lo sawm ang.

PU LALCHAMLIANA, MINISTER : Kan Deputy Chief Whip zahawm tak Pu Lalrintluanga Sailo zawhbelhna kha chu Starred Question 53-ah hian a chhanna a awm a.

Tun dinhmunah chuan Reiek BDO area chhungah hian Police Out Post dah tum a ni a. North Kanghmun khua, Reiek tlangdung thlangah khuan Out Post dah tura rawtna kal mek a awm a ni.

Hei hi Reiek BDO area a nih vang hrim hrim pawh a ni lova. Ka'n sawi zau hret ang a, khulai area-ah khuan Police Out Post hi a khat lutuk a. Mamit bialtu zahawm tak sawi ang khan khumi Kanghmun tlangdungah khuan dah theih ni ta sela tiin rawtna hi a lo chhuak a ni tih kha ka'n sawi kai tel duh a ni.

North-II member zahawm tak Pu Vanlalhlana zawhna foreigner lam kha ka lo inbuatsaih miah lo mai a. Amaherawhchu, foreigner chungchanga ka hriat theih chhun chu tunah hian Burmese rattlan hi figure a inang chiah lova, deport tur tih central atangin thu a lo kal a. Chutah chuan Assam Rifle figure- te, D.C figure-te a inang chiah lo naa tunah sawn identification an ti mek a, D.C Office kaihhrainain. A thenin 238 an tih laiin a thenin 228 ti te an awm a. Identification an tihfel zawh hnuah chuan Burma lamah, a tul a nih chuan tha rum pawhin nawr let mai rawh u tih ang deuh thaw khawpin central atang hian direction a rawn awm a ni. Khamite bak kha chu foreigner an awm leh awm loh lam hi ka chhhang mai thei lo e.

Mamit bialtu zahawm tak Pu H. Lalzirliana zawhbelhna kha Rajiv Nagar-ah khuan Police Out Post dah tumin hma lak a ni tawh a, a hmunhma tur a awm em tih enfiah a ni tawh a. Amaherawhchu, khulai khu mimal ram vek a lo nih avangin to tak, sorkar-in pawisa tam tak senga ram lei ngai tur te a nih avangin hetah hi chuan ti lo phawt mai teh ang an ti ta a. Engemaw thulhah Tuipuibari-ah 5th IR, BOP a awm

bawk alawm maw le tiin department lam hi kan inhnem ta mai mai rih a ni. A sawi ang khan, khuliah khuan Civil Police kan tih mai thin, MRP hmun khu a hla khawp mai a, sorkar pawh hian a hria a, khatiang khan hma a la tawh na a, a la remchang thei rih lova a pawh khawp a. Ani chang ni lo hian hmun hrang hrangah hian Police Outpost dilna hi a awm a ni. Sorkar hmasa pawh khan hmun 9 laiah i din ang tiin thutlukna an lo siam tawh a ni. Mahse a implement lai taka hi a lo har thin a, ka sawi thiam ve dan chuan pawisa te reuh hi duh khawp hi a awm lova. Chuvang chuan pawisa harsatna avangin rawtna tam tak lo awm tawh, sorkar ngei pawhin siam tha a tih pawh a la tipuitling hlei thei lo tih kha ka sawi kai duh lawk a ni e. Ka lawm e.

SPEAKER : Tunah chuan zawhna dangah kan kal leh ang a, Starred Question No. 42-na zawt turin member zahawm tak Pu Lalduhoma i lo sawm ang.

PU LALDUHOMA : Pu Speaker, ka lawm e. Ka zawhna te chu:

- a) Tun dinhmunah Mizoramah valid ILP nei hnam dang engzat nge awm?
- b) ILP nei lova Mizorama awm an awm em?
- c) ILP pek dan hi computerize tumna a awm em?

SPEAKER : Chhang turin Minister zahawm tak Pu Lalchamliaana i lo sawm ang.

PU LALCHAMLIANA, MINISTER : Ka lawm e. Member zahawm tak Pu Lalduhoma zawhna chhanna chu hetiang hi a ni.

- i) Tun dinhmunah Mizoramah valid ILP nei hnam dang 21757 an awm.
- ii) Valid 2 years ILP for GST nei hnam dang mi 135 hnenah May 2017-May 2019 chhung khan Home Department kaltlangin concerned DC ten an pe chhuak a ni.
- b) Sorkarin kumin 2019 January – May chhung hian ILP nei lo mi 1893 man in a thawn let tawh a, tunah hian ILP nei lo hnam dang Mizorama an awm hriat a ni lo.

c) ILP pek dan hi computerize tura hma lak mek a ni.

SPEAKER : Zawh belh turin zawhna nei tur Pu Lalduhoma i lo sawm ang.

PU LALDUHOMA : Pu Speaker, ka lawm e. Tuna kan system-ah hi chuan ILP nei lo kha kan check thin loh chuan hriat dan ngawt a awm thei lova. Kan NGO-ah te hian kan innghat deuh mah mah em? Kan sorkar hi a mualpho em ka ti a. NGO te nena tan tlan hi chu a tha em em tho va, a khat tawka sorkarin a check thin loh chuan lo awm ru te kha detect theih a ni dawn lova. Surprise check te pawh kha neih tam deuh theih dan a awm em tih ka zawhbelh duh a ni.

Tin, an kut ni vangthlaa an kal khawm han en hian an tam lulai ta em mai a, ILP valid nei an ni seng lovang tih te hi pakla hisapin kan han ring ve mai mai a. Tin, renew a ngaih te hian a tithiam anmahni zing ami DC office dawr thiam hi an nei a. Tiang khan thil hi a inthlung ve tawh a, kan DC office-ah te pawh hian dik mang lo a lo awm thin a tunhma pawh khan House-ah te pawh kan sawi chhuah tawh kha. Chuvang chuan fimkhur leh zuala kalpui dan a awm thei ang em? Kan computerize hma loh hi chuan kan heti reng dawn a. Vairengte check gate-ah, District-ah, an kalna apiang Police Station-ah information inpe chhawngin, central sorkarin FRRO a enkawl ang hian enkawl ila. Vawiina valid nei naktuka haw tur, thlaleha haw tur, khang zawng zawng kha an click ang a an hre thei nghal zel dawn a ni. Chuti khawpa chianga computerize a nih hma loh chuan kan hnam hi kan inchim tir tial tial dawn in ka hria a ni. Engtik hunah nge computerization hi kan tihlawhtlin theih ang tih kha ka zawhbelh duh a ni.

SPEAKER : Pu Lalrinsanga Ralte member zahawm tak i lo sawm ang.

PU LALRINSANGA RALTE : Pu Speaker, ka lawm e. Member zahawm tak Pu Lalduhoma zawhna te nen pawh khan a inang chho dawn a. MNF ministry hmasa khan Vairengte-ah khuan Sub-jail a lo siam a, chu chu sorkar hmasa khan a function tir lova, NLUP bawngte kha an dah ta a. Tunah khuan a structure tha takin a la awm a, tlem tlem chhei that ngai a ni a. Tunlaiah ram a lo changkang chho zel nen, ramri bula awm kan ni bawk

a, kan mamawh khawp mai. Sub-jail hi function tir theih dan a awm ang em tih ka zawt duh a.

Tin, Sub-jail bulah khuan Police Department-in ram ruak zau tha tak mai an nei a, chu pawh chu enkawl lohvin kum 10 lai a lo awm tawh a. Helaiiah hian IR Headquarter dah ni ta se, ramri hi inkaha fel thei a ni lo va, a luaha luah a ngai a ni. Chutiang tur chuan Police check-gate thlanga PWD building rauhsan mai mai ah te khuan, Vairengte-a IR Company Headquarter kan siam chuan platoon te pawh riahthlak tir theih an ni dawn a ni. Hei hi kan ramri venna atan pawh a tha dawn hlein ka hria a ni.

Tichuan ka zawhna chu Vairengte ram Police ram ruak awmah khuan IR Company Headquarter dah theih a ni ang em tih leh Sub-jail hi function tir leh theih a ni ang em tih a ni.

S P E A K E R : Minister zahawm tak chhang turin i lo sawm ang.

P U L A L C H A M L I A N A , M I N I S T E R : Pu Speaker, ka lawm e. Zawhbelhna hnuhnung kha ka chhang hmasa mai ang a. Starred Question 43-naah khan amah pawhin a sawi ang khan Vairengte Sub-jail hi function tir tumna a awm em tih a ni a. A chhanna chu tun tumah hi chuan function tir tumna a la awm hrih lo a ni. Amaherawhchu, hmanni lawkah khan bialtu MLA zahawm tak leh Official thenkhat te nen kan tlawh a, hun rei tak chhung enkawl tawh loh a lo ni a. Building tam tak pawh khu a rawp tawh hle mai a, mahse kan hriat angin Vairengte khu ramri a ni a. Zu khapna dan kan han lek kawh phei hi chuan khulaiiah khuan tlathla tawk an awm thin a, mawilo taka che nula tlangval an lo awm thei thin a, khangho dahna kha a awm thei thin lova. Chuvang chuan khulai khu engemaw ti tala function tir theih dan hi awm thei se tih hi department duh dan a ni tih ka rawn sawi a ni. Zawhna nei tu member zahawm tak Pu Duhoma sawi kha a dik khawp mai. Inner Line Permit nei pawh 21757 zet kan ram ah an awm tawh a. Khami hrul ah khan Inner Line Permit nei chiang kuang mang lo te an awm a ni. Inner Line Permit pek dan chungchang hi tun aia khauh zawka tih dan kawng a awm em tih official ho hian hma an la mek a. Tun aia tha in dan duan thar a lo chhuak ang a, chu chu kenkawh theih te pawh kan in beisei a. Fimkhur leh zuala Inner Line Permit hi pek a nih theih na turin awareness campaign te pawh rei lo te ah department-in tih a tum a,

sponsor turte hian an mawhphurhna hi an hre lo fo a. An sponsored a te ILP a lo tawp a, thawn haw nachang emaw, report nachang emaw an hre thin lova. Hei hian harsatna tam tak kan tawh phah thin a ni. Tichuan, periodical checking hi i uar ang u kan ti a, tlawmngai pawl te nen legality a awm theih nan tlawmngai pawl te leh police te i thawk ho ang u tiin kumin kum tir khan sawihona kan nei tawh a. Kan police te pawh election-ah khan state dangah chhuak an tam em mai a, company 16 lai mai Mizoram atangin kan police te an chhuak a. Chuvang chuan kan indaih lo va, hei an rawn haw tawh a, member zahawm tak te duhdan ang leh keini pawhin kan duhdan angin tun aia zia zawkin surprise checking tih te kan lo tum ang e.

Tin, computerize chungchangah hian kan official ten hma an lo la thui hman hle tawh a. Hmanni lawkah Bairabi leh Vairengte-ah temporary-a an issue-na hmunah ka tlawh a, chutah chuan an lo computerized vek tawh a, register hrim hrim a kha chu, chutiang chuan hma kan theih ang tawkin kan la chho zel a, computerize zel turin. Kha kha ka sawi Bairabi leh Vairengte kha temporary ILPa ni a, regular pe thei tu chu DC te an ni a, a form te pek na turin computerize vek turin hma an la mek a ni tih kha ka han sawi kai a ni e. Ka lawm e.

SPEAKER : ILP chungchanga Home Minister chhanna ngaihthlak a nuam hle mai a, a thlamuan thlak e. Kan fimkhur a ngai a ni, June ni 5-a pungkawm han hmuh kha chuan luipui kama tiau chhiar sen loh zat dawn an awm a nia. Home Minister hovin hma an la a nia, a lawmawm e.

Tunah chuan kan business dawtah kan kal ang a.

Pu LALDUHOMA : Starred Question 5-na chhanna ah hian Tourism Policy copy min pe thei em ka ti a, enclosed a ni an ti a, mahse a copy a awm tlat lo mai a, an tihsual palh a nih ka ring a. Unstarred a nia, a tel lo alawm hei, enclosed an ti a, a tel si lo va, ka rawn sawi mai a nia. Zero hour te hi kan hmang ve ngai reng reng lova, kan fel leh lutuk a. Thil pakhat dang han sawi duh ka neih chu MLA ten kan Minister te hnena lehkha kan ziah te, kan official te hnena lehkha kan ziah te hi, ka ziah chu chhanna pakhat mah ka la hmu lo vek a ni. Hei hi thil kal phung a ni lova , MP te pawhin lehkha an ziah chuan official ten an chhang tur a ni a, central Minister ten an chhang ngei ngei tur a ni. Acknowledgement emaw, eng emaw tal, kan Minister zingah pawh hian min response lo an awm a, kan official zingah pawh hian min response lo an awm a, hei hi kan House Leader zahawm tak hian in min hriat

sak sela, kan protocol leh kan tradition hi vawn nachang kan hre lo ta deuh em ni ka'n ti a nih chu.

SPEAKER : A lawmawm e, kan Minister ten an lo hre dawn nia. Chief Minister pawhin a hriat tak chu. Member zahawm tak kan Deputy Chief Minister zahawm tak Pu Tawnluia a dam lo va, hei hi puan leh thin a ngai a, a paw khawp mai, a dam leh thuai kan duh sak a. Tun ah chuan Laying of Papers-ah kan kal ang a. Chief Minister zahawm tak Pu Zoramthangan House dawhkanah heng papers te hi rawn lay se.

- i) The Mizoram Municipalities (Ward Committee and Local Council (Third Amendment) Rules 2015.
- ii) The Mizoram Municipalities (Facilities to Mayor, Deputy Mayor, Chairman, Vice Chairman and Councillors) Rules, 2018.
- iii) The Mizoram Municipal Appellate Tribunal Rules, 2017.
- iv) The Mizoram Urban Areas (Land Development, Landslide Prevention and Mitigation) Rules, 2017.
- v) The Mizoram Street Vendors (Protection of Livelihood and Regulation of Street Vending) Rules, 2017.
- vi) The Mizoram Real Estate (Regulation and Development) Rules, 2019. te hi a remdan angin House-ah rawn lay se, i lo sawm ang.

Pu ZORAMTHANGA, CHIEF MINISTER : I remtihna leh House remtihna in heng te hi House Table-ah ka rawn lay e.

- i) The Mizoram Municipalities (Ward Committee and Local Council (Third Amendment) Rules 2015.
- ii) The Mizoram Municipalities (Facilities to Mayor, Deputy Mayor, Chairman, Vice Chairman an Councillors) Rules, 2018
- iii) The Mizoram Municipal Appellate Tribunal Rules, 2017.
- iv) The Mizoram Urban Areas (Land Development, Landslide Prevention and Mitigation) Rules 2017.

- v) The Mizoram Street Vendors (Protection of Livelihood and Regulation of Street Vending) Rules, 2017.
- vi) The Mizoram Real Estate (Regulation and Development) Rules, 2019. Pu Speaker, ka lawm e.

SPEAKER : Aw le, a copy kha han sem sela. Health Minister zahawm takin thu lawmawm tak mai arawn thawn a. ‘Session lai hian memberte tan health check up hi Civil Hospital-ah ruahman sak dawn ta ila remchan lohna a awm ang em?’ arawn ti a, ‘awm lo tawp ang’ ka lo tih lai tak a nia. Health Minister chungah kan lawm hle a ni.

Jam lai hi Session lai vek a ni a. Kan changkim em? Kan chan kim chuan a pahnihna ah kan kal ang a. PAC chairman zahawm tak Pu Lalduhoma’n heng paper te hi han lay leh se:

- 1) Statement of Actions taken by the Government on Further Recommendations contained in the 30th Action Taken Report of Public Accounts Committee relating to Health & Family Welfare Department.
- 2) Statement of Action taken on the Further Recommendations of Public Accounts Committee contained in the 31st Action Taken Report, 2018 relating to Transport Department te hi rawn lay se, i lo sawm ang.

PU LALDUHOMA : Pu Speaker i phalna leh he house zahawm tak remtihna in

- 1) Statement of Actions taken by the Government on Further Recommendations contained in the 30th Action Taken Report of Public Accounts Committee relating to Health & Family Welfare Department leh
- 2) Statement of Action taken on the Further Recommendations of Public Accounts Committee contained in the 31st Action Taken Report, 2018 relating to Transport Department te hi ka rawn lay e.

S P E A K E R : A copy kha han sem rawh u le. A copy kan chang kim em? Kan chan kim chuan panga na ah kan kal leh ang. Tun ah chuan presentation of report ang. Subject Committee III Chairman zahawm tak Dr. ZRThiamsanga The

Third Report on Action taken by the Government on the recommendations contained in the Twentieth Report of the Subject Committee-III of the Seventh Legislative Assembly of Mizoram relating to HIV/AIDS under Health & Family Welfare Department present turin i lo sawm ang.

Dr. ZR.THIAM SANGA : Pu Speaker i phalna leh he house zahawm tak remtihna in The Third Report on Action taken by the Government on the recommendations contained in the Twentieth Report of the Subject Committee-III of the Seventh Legislative Assembly of Mizoram relating to HIV/AIDS under Health & Family Welfare Department hi ka present e.

S P E A K E R : A copy kha han sem u la. Kan chang kim maw? Kan chan kim chuan kan business dang ah kan kal ang a. Financial business ah kan kal ang a. Tunah chuan Financial business ah Chief Minister zahawm tak leh Finance Department chang tu in 13.6.2019 (Ningani) a budget a pharh tak The Annual Budget for the year 2019 to 2020 kha sawiho na General discussion kan nei tawh ang a. Tichuan kan hriat angin vawiin leh naktuk hi sawi ho tur a ni a, nihnih hi kan tih dan a ni thin a, member te kan phur pheih chuan vawiin hian kan sawi teuh thei dawn a ni. Tichuan sawiho na kan tan ang a, minute engzatnge kan in pek ang le, minute eng zat nge niang?

PU C. NGUNLIANCHUNGA : Pu Speaker General discussion a ni a, nihnih hun kan nei bawk a, 20 minutes theuh sawi i la.

SPEAKER : Kan dan ah hian minutes 20 hi tih ngai a ni lova minute 15 a ni a, Speaker in a phal chuan tih a ni a. Amaherawhchu vote on account in a kal ve tawh bawk a. A hma kha eng engemaw te kha hriat ruai ruai te a ni tawh bawk a, minute 10 kan ti dawn nge niang? Minute 10 ah ti ila Group Leader-te kha minute 15 em ni kan tih kha, tah khan anni khan anrawn fun hnem deuh turah ngai ila. A nih leh minute 10 ah ti mai ang aw, hei kan pelh ngai miah loh hi a hun rei tak ata tawh.

Minute 10 ah kan ti ang a thusawina hun kan tan ang a. Tunge han sawi hmasa ber ang le. Sawi hmasa nih kan chak thin kha maw. Han sawi rawh ule.

Aw, member zahawm tak Pu C. Lalsawivunga. Minute 9 (kua) ah warning kan inpe dawn nia aw.

PU C. LALSAWIVUNGA : Pu Speaker, ding an awm lawk lova, a hmahruai ah ka'n tang mai ang a. A hmasa bera ka sawi duh chu hei budget hi a bu te kan han hmu a, full budget a ni a. Tah hian kan Chief Minister, Finance Minister ni bawkin budget a rawn pharh hi hriatthiam tur zawngin, mawl te si, fiah takin a rawn present a. Tin, sum hmanna tur pawh a rawn thliar hrang thliah thliah a, en a nuam a. Budget speech hi tha thawkhatin ka hria a, lawmthu sawina in bul ka tan ni sela, a lawmawm hrim hrimin ka hria a ni.

Kum 2019 leh kum 2020 budget pumpui kha crore 10692.30 a ni a, 2018 leh 2019 aia a punna hi crore 1019.66 a ni. Tin, kan budget pumpui atanga sorkar hnathawk hlawh, pension hlawh leh sorkar inrelbawlina atan hian crore 8403.52 dah a ni a, chu chu budget pumpui atangin 78.59% a ni.

Tin, capital expenditure-ah hian crore 2288.78 dah a ni a, chu chu budget pumpui atangin 21.40% a ni a. Nikum 2018 – 2019 RE ai hian 2254.9 - in a tlem thung a ni. 2018-2019 aia a tlemna chhan hi kan Chief Minister zahawm tak hian min lo chhinchhiah sak sela, min sawifiah sak turin ka beisei a ni. Sorkar hnathawkte inrelbawlina, pension atan te, hnathawk hlawh atan te hian heti zat hi pawisa dah a nih lai hian mipui tana hnathawhna tur capital expenditure-ah budget hi a hniam hle mai a, helai hi min sawifiah sak sela a thain ka hria. Capital expenditure-ah hian crore 2288.78 a ni a. Sorkar hnathawkte hlawh leh sorkar inrelbawlina leh pension atan hian crore 8403.52 a ni a. Heta tanga chhutin hmasawinna thar hmel hmuh tur beiseina a tlem mang e aw tih kha rilru ah a awm lo thei lova. Chuvangin min hrihfiah sak sela thain ka hria a ni.

Tin, revenue receipt lamah hian kumin chhunga tax revenue hmuh kan beisei zat, state owned tax revenue atang hian crore 573.69 a ni a. Tin, state share of central taxes and duties kan tih Goods and Services Tax (GST) huam tel veka kan beisei zat kha crore 3885.19 a ni a. Tichuan, a vai hian crore 4458.88 a ni a. Hei hi nikum R.E atanga chhutin tax revenue atanga sum hmuh beisei zat hi 13.52% in a pung dawn thung a ni.

Tin, non-tax revenue hnuaiia state owned non-tax revenue beisei zat hi crore 459.30 a ni a. Tichuan kan budget-a kan ramin kan tharchhuah ve tur chu 2019 – 2020 chhung hian crore 1032.99 niin a lang a. Tichuan, revenue receipt atanga hmuh kan beisei crore 9846.99 atangin chu chu 10.99% a ni tih kan hmu a. Capital receipt atangin kumin chhung hian crore 845.31 hmuh kan beisei bawk a ni a. Helaiiah hian nikum lam aiin chhiah atanga hmuh kan beisei hi a tam daih mai a. Chutih lai chuan nikum te, kum hmasa lama chhiah kan lo lak thin na zu chhiah te hi tun tumah hian a awm tawh lova. Chutih rual chuan vehicle tax lama kan hmuh thin pangngai lifetime tax kan tih danglam atang hian kan sum hmuhna a tlem sawt tura ngaih a ni bawk a. Heti chung hian chhiah hi crore 225.8 lai hian a pung dawn thung a ni. Pu Speaker, hei hi min hrilh fiah a ngaiin ka hria. Khatizat chhiah kan lo lak thinna a kiam a, mahse ₹ 225.8 crores lai maia kan state bil in sum kan hmuh tur a pung thei tur hi ka hrethiam lo nge min hrilhfiah ka beisei bawk a ni.

Tin, Pu Speaker, kan budget piah lamah hian he kan budget-a tarlan si loah hian chhiah kan lak thar tur hi a awm nge, entirnan heng tui bill te, electric bill te a punna hi rawn tarlang chiah lo mahse, heng ah te hian tihpun tumna a awm em? Heng atang te hian em ni kan state bik pawisa hmuh chhuah tur nikum lam aia a sanna hi tih te kha rilru hian a ngaihtuah a, chhiah lak tum a nih dan min hrilhfiah ka beisei bawk a ni . Kan budget piah lamah hian thil lawmawm tak kan Finance Minister-in budget speech-a a rawn sawi kha sawi chhuah duh ka nei bawk a. Kan budget hi chu a chi tur a nih thu kha min hrilh a. Central atangin sum a tam thei ang ber hai luh kan tum a ni tih kha min hrilh bawk a, a lawmawm hlein ka hria. Amaherawhchu kan ram dinhmun han en hian hmasawanna, infrastructure thilte hi uar taka tun aia nasa leh zuala kalpui tura hma kan lak a pawimawhin ka hria a. Tin, kan budget neih ang leh kan pawisa neih ang ang atang hian sum dek chhuak zawnga, (revenue earning) eng emaw siam zawnga pawisa kan hman pawh hi a pawimawh dawnin ka hria a ni. Pu Speaker, chutiang a nih loh chuan kan state dinhmun, kan ram dinhmun en hian tuna kan awm angah hi chuan a manganthlakna lai te pawh hi kawng tam takah a awm a, chuvangin vawiinah hian hmasawanna rahbi tha kan neih theihna turin heng kan pawisa te hi tangkai leh uluk taka hman a pawimawh a ni tih kha Pu Speaker, ka rawn sawi a ni e. Ka lawm e.

SPEAKER : A lawmawm e, tunge sawi leh ang? Member zahawm tak Pu Zodintluanga Ralte.

PU ZODINTLUANGA : Pu Speaker, chair atang khan nidanga kan tih danin 15 minutes kha i ti a, lehlam atang khan 10 minutes a ni an rawn ti bawk si a, 10 minutes-a kan tih chuan vawiinah hian kan zo vek mai thei awm mang e, 10 minutes theuh kan sawi chuan.

Pu Speaker, vawiinah kan sorkar in kum 2019- 2020 regular budget a lo pharh thei hi a lawmawm ka ti a. Kan hriat theuh angin MP election te, model code of conduct te a lo awm chho a, full budget session kan nei theilo a, khami chhung khan sorkar hmalakna tur te pawh tihpuitlin a har hle a, vawiinah full budget kan han pharh thei hi sorkar ka lawmpui tak zet a ni tih ka rawn sawi duh a.

Democracy ramah chuan budget kaltlangin sorkarin a kalphung a siam thin a, chumi atan chuan sorkar pawhin budget te kan pharh a, kan ram kaihhruai kan tum dan leh ruahman dan tlangpui te kan sawi thin a. Chumi tur chuan vawiinah Pu Speaker, Finance Minister zahawm takin budget speech atanga a sawi tlem tlem rawn sawi ve ka duh a. Pakhatnaah chuan Fiscal indicator chungchang hi rawn sawi lawk ka duh a. Revenue surplus hi ₹ 1443.47 crores tura chhut kha a ni a, hei hi kan GSDP atanga teh chuan 5.58 % a ni a, hei hi thil lawmawm tak a ni a. Amaherawhchu revenue surplus kan neih nachhan hi kan hriat theuh angin central atanga 14th Finance Commission grant kan hmuh that vang kha a ni tih hi kan hrechiang vek a. Kan state owned resource atanga revenue kan hmuh hi a tam tak tak theilo a, hemi ti tur hian sorkar pawh kan tan a ngai hle mai a. Kan tax leh non-tax revenue atanga kan hmuh theih ang ang te hi uluk tak leh thahnemngai taka kan lak khawm hi a tul dawn a, keimahnin kan tih theih ang tiloa central sorkar grant ringawta inghah emaw, mahni tih tur ti si lova mite tanpui nghah ringawt te hi chu a puitlin loh thlak hle dawn a ni. Tin, kan fiscal deficit hi – (minus) 5.3.07 crores ni tura chhut a ni a, chu chu GSDP atangin 2.06 % a ni a. Fiscal deficit hi sorkar kalphung a nih avangin a neih loh theih lo a , amaherawhchu hemi fiscal deficit sang lutuk tur hian kan sorkar pawh tan a ngai viau dawn a ni tih vawiinah ka rawn sawi tel duh a. A bik takin sorkarin a sum puk te hi capital investment atana hman zel loh chuan kan sum puk leh a kalphung a fuh lo hle tihna a ni dawn a, chuvangin sorkar

hian a sum puk hi awmze neia economic principle fel tak hmanga sum enkawlina hi kalpui turin kan beisei bawk a ni.

Tin, outstanding liabilities hi 2019 -2020 kum tawpah ₹ 8847.97 Crores tura chhut a ni a, chu chu kan state GSDP atanga chhut chuan 32.66 % tura chhut ni a, hetiang GSDP atanga chhuta leiba tlingkhawm a tla hniam hi sorkar hmasain theihtawpa sum inrenchema hma a lo lakna kal thla zel a ni a, hemi lo chhunzawm zel tur hian kan sorkar pawh hi theihtawp chhuah tur leh tang turin, kan liabilities te hniam zel thei tur hian tan la sela tih hi ka duh khawp mai a.

Tin, Finance Minister zahawm tak khan SEDP atan ₹ 750 crores a dah tih kha a tarlang a; tin, SEDP sorkar flagship a nih thu pawh kha a rawn sawi a. Department hrang hrangah SEDP sum te sem rual a nih rual hian zawhna tlem te Pu Speaker, nakinah min hrilh fiah tura ka duh point chu he SEDP hi a programme kalphung tur mumal tak hi sorkar hian a duangchhuak tawh em ? SEDP nihphung leh a kalphung tak emaw, he programme-in a ngaih pawimawh, a thawh tum te tih chian a ni tawh em tih hi min hrilh Chiang turin ka ngen a. Tin, SEDP hian framework mumal fel tak neia, chumi mila fund allocation te siama, a thawh tur leh hmalak na tur te hriata monitoring framework fel tak nei turin keini pawh hian kan lo beisei bawk a ni.

Tin, Pu Speaker, kan budget speech-ah hian a rawn lang Chiang em em a, sorkar priority kha rawn duanchhuah a ni a. Chungah chuan District thar siam te, Health & Family Welfare tih te, zirna hmasawna, Health Care, NEDP leh SPP hnuaia project kal mek thawhzui na atana dah te, skill development te, SEDP normal fund, thalaite infiamnaa hman tih te a ni. Kan sorkar priority hi sorkar kalphung pangngai leh sorkar in hmasawna tura ruahmanna a siam phung hi a priority-ah hian a rawn dah tlat mai hi kan sorkar thar in kan ram a kaihhruai dan tur hi a rawn tichiang em em in ka hria a ni. He budget-ah hian sorkarin a lo sawi tawh thin Agriculture sector-ah te an hmalak dan tur te priority-ah hian awm ngei tura ka beisei lain a awm lo va. Tin, election dawna an intiamna, hmun tina an sawi chhungkaw tina ₹ 3 lakh kan sem ang, an tih ang chi te kha budget-ah hmuh kan beisei lain kan hmu lo a. Tin, kawng chhawng siamna tur te he budget-ah hian priority-ah hian dah sela chuan an thutiam ang kha a takin a awm turah kan lo ngaih

lain, kawng chhawng siamna tur te chu central sorkarah kan zuk dil e, kan la ti laih laih chauh a ni a.

Vawiin thlenga sorkar tharin a ngaihpaawimawh em em Mau sawngbawlina tur ang chi te hi sorkar priority-a a awm lo hi mak kan ti a. Heng te hi kan ram, thingtlang mirethei leh kut hnathawktute chawikanna tur ang zawnga kan budget kan kalpui lo hi a paw ka ti hle a ni. Tin, kan budget zinga lawmawm ka tih ve pakhat chu NEDP hna chhunzawmna tur atan cheng nuai 11000 lai an rawn dah hi Pu Speaker, Finance Minister chungah lawmawm ka ti a. Sorkar hmasain a lo thawh tawh infrastructure tha tak tak siamna tur, chhunzawmna tur, zawhna tur an rawn dah hi lawmawm ka ti a. Tin, PAHOSS (Parking Scheme) atana nuai 6000 an rawn ruahman hi a lawmawm rualin PAHOSS tih hi a lam hi a harsa ang reng khawp mai a. Tunlai sorkarin an phurpui em em hming thlak hi an uar baw si a, hming lam a harsat avangin PAHOSS tih hi a lam pum te hi sawi a har si a ZOHOSS tih emaw, ZORAMHOSS tih emawa thlak hi Pu Speaker, ka rawn rawt baw a ni. Hming thlak hrim hrim hi tunlaiah an uar si a, a lam a awlsam deuh ang chu kan ti a ni.

Pu Speaker, sorkar that, budget thar kan hmang chho dawn a ni a. Heng an tihna turah te nichina kan sawi ang khan ruahmanna ang hi chu a lang kuar mai a. Kut hnathawktu leh miretheite chawikanna lampang a awm lo a, chhungkaw tina nuai 3 sem tur a awm lo a. Chuti chung chungin Pu Speaker, kan sorkar thar hi kan ram leh hnam a enkawlina turah duhsakna sang ber, kan ram mipui ten an chhawr theihna tur atan he budget kaltlang hian hnathawktu turin duhsakna ka hlan a ni e. Ka lawm e.

S P E A K E R : A lawmawm e, tunge sawi leh ang? Ani khan minute 5 a boksik che u a nia, midang tan khan. Member zahawm tak Pu V.L.Zaithanzama i lo sawm ang.

Pu VL. ZAITHANZAMA : Pu Speaker, an inthiam khek deuh hlawm niin ka ring a, a hre lo ber hi kan ding hmasa teh ang. Vawiinah hian 2019-2020 budget kan sawiho dawn a ni a. A hmaa kan ngaihthlak tawh ang khan kumina kan budget hi vaibelchhe 10692.30 a ni a. 2018-2019 aiin vaibelchhe 1019.66 in a tam a ni a. Chutihlai chuan 2019-2020 chhunga Mizoram leiba kan neih belh tura chhut, kan budget punna aia tam hret vaibelchhe 1455.58 a ni a. Pu Speaker, budget te hi kan la expert ve vak lo a, kan budget punna leh kan bat belh tur hi kan budget punna aiin a

tam hret a. Chuvang chuan a pung pawh ka ti ngam chiah lo va, chu chu ka sawi duh a. Kha kha nakinah kan Minister kan Chief Minister khan min la hrilhfiah theih chuan a lawmawm khawp ang a.

Pu Speaker, keini ang hre thuk lem lo tan chuan a buaithlak khawp mai. Vawiinah hian han sawisela han fak em em tur khawp pawhin ka hre lem lo a. Chuvang chuan a fakna lam te, a sawiselna lam te kha kan tihpawlh deuh nawk nawk ang a. Kan sorkar thar flagship programme SEDP vaibelchhe 750 chungchang kha ka rilruah a lo lang a. SEDP hi NEDP hming kha kan thlak mai em maw ni chu aw ka ti deuh a. Mahse, a lo danglam deuh hlek tih chu han thlir chian khan a lo lang ta mai a. Nichina member zahawm tak ka hma ami Pu Zodintluanga Ralte sawilan tak ang khan SEDP mipuiin kan lo thlir cheng nuai 3 chhungkaw tina sem kha a lang ta lo a. Mahse, kan Finance Minister zahawm takin a sawi atanga a lan dan chuan kawng tlabal siamthatna nuai 15,000 te a lo lang ta daih a. District pathum tan nuai 885 tih te, Doctor leh Nurse post ruak lak nan te, infiamna hmunhma thawm that nan nuai 1000 tih te. Tin, a tam ber project buaipui nan nuai 30000-te a lo lang a. Health Care Scheme tih te, NEDP, SPP project enkawl zuina te, Skill Development tih te. Khata ka'n lawm riau na chu Pu Speaker, keini ZPM-ho hi sem policy duh vak lo kha kan nia, sem lampang hi a lang ta vak lo a, hei hian mi ti lawm ang reng a, tlem a zawng erawh chu duhsak zawng sem tur chu a la awm tho turah ngai ila. Hetia sem tur a tlem anga lang hi kei chuan a lawmawm lamah ka ngai a ni.

Thil pakhat lek ka sawi leh duh chu kan thalai te, infiamna lama tui mite tan kan sorkar thar hian ngaihtuahna a rawn hmang hle mai a, hei hi a lawmawm ka ti a. Infiamna lam hmunhma thawm that nan cheng nuai 1,000 SEDP atanga hman tur a lo lang te hi thalai tan a lawmawm hle.

Tin, chu ai mah chuan incentive cash award atana nuai 100 lo lang hi lawmawm ka ti a. Hei hian a daih chiah lo a nih pawhin a dang siam belh thei turah ngai ta ila. Sport policy puitlin nan nuai 150 a lo lang bawk a. Sport lama kan thalaiten hma an sawn theihna tura ruahmanna hrang hrang lo lang hian sport discipline hrang hrangte a ti lawm ngei ang tih ka ring a ni.

Kan budget hi tha taka kan hman a, Mizoram tan hmasawanna a nih ngei theihna turin khang ka hriat ang angte kha ka'n sawi ve a ni e. Ka lawm e.

SPEAKER : Tunge sawi leh ang? Pu Zothantluanga, member zahawm tak i lo sawm ang.

PU ZOTHANTLUANGA : Pu Speaker, ka lawm e. Kan budget kan Chief Minister zahawm takin Mizo tawnga fiah tak maia a rawn pharh hi a lawmawm ka ti a. Hnam party-in a tihawm tak a rawn ti hi a ropui ka ti a. Tin, budget hi tam tak tan chuan hriatthiam a har viau mai a, kan budget speech-a kan Chief Minister zahawm takin a han sawi chhuah dan hi a fiah a, hriatthiam a awl bawk a. Chuvang chuan he budget present dan hrim hrim hi a fakawm a, a tha hlein ka hria a, a sawifiah a. Union budget-te an pharh hian dawrkai te te te, kuhva zuar te leh thingpui dawr takngial te pawh hian an ngaihven a, an hre em em a. Keini Mizoramah hian kan ngaihven lo viau a, mipui budget a ni lo emaw tih tur khawpin kan ngaihsak lo a. Keini ang layman tan pheii chuan hriatthiam a har a. Kan hrethiam lo thin bawk a, keimahni min nghawng lo emaw tiin kan ngaihtuah lo viau a.

Tunah erawh hi chuan budget-te hi mipui budget a ni tihna ah hian kan thangharh ta a. Chanchinbu mite leh mi tam tak hian kan ngaihven a, kan hre viau bawk a, chuvang chuan tun tuma budget pawh hi mipui budget a ni ti ila, mipuite tan budget tha tak a ni tih ka sawi duh a.

Tin, tun tum hi general discussion a nih angin a tlangpui zawr zawr han sawi chhoh ka duh a. MNF sorkar hmasaah khan 2007-2008-ah MNF sorkar khan district 3 an puang a, nimahsela kum 10 chhungin tihhlawhtlin a ni lova. Amaherawhchu, Congress sorkar-in a hmaa district 5 an puan erawh chu engmah ti hman lo mah sela MNF sorkar lo piang khan a tihlawhtling a, district a function tir a. A hmaa sorkar kal tawh in thil tha an tihchhunzawm kha a awm a, tihhlawhtlina a lo awm kha a ropui a, politician-te hian kan tih zel tur pawh niin a lang a.

Amaherawhchu, MNF-in 2008-a district 3 an puan ve erawh chu Congress sorkar, kum 10 sorkar khan a hlamchhiah a, engmah khami kawngah khan hmalakna a awm lo a ni tih kan hria a. Politics-ah vote duhna avangin tihhlawhtlin tum anga insawiin, nimahsela sorkar-na kan lak chuan kan theihngihl leh thin a. Pu Speaker, tun tumah hian MNF sorkar, Pu Zoramthanga sorkar chak takin district 3-te an function theihna turin tih tak takin hma a la a ni tih hi he budget-ah hian a lo lang a. DC pathumte an function na tura nuai 450 lai mai a han dah hrang te, SP office pathum sakna tur atan nuai 195 lai a han dah te hian district tihhlawhtlinna leh

chumi kawnga hma a lak tumna tilangin he budget-ah hian a rawn reflect a ni tih kan hria a. Tin, district ding thar tur a nih avangin a inrelbawlina tur leh district chu fuke kima a lo pian theihna tur atana thil chi hrang hrang a mamawhte thawhna turin cheng 885 lai mai a han dah te hian tihlawhtlin an tum zia te leh district function tir tak tak an tum zia tih a lang chiang a, a lawmawm hlein ka hria. Ni e, tawngkam ringawta intiama a tih hlawhtlin kawnga sum leh pai tul leh mamawh te dah a nih loh chuan a hlawhtling tak tak ngai lo a ni tih kan hria a. Kan Chief Minister budget-ah erawh chuan tihlawhtlin tumin sum leh pai tha takin a rawn dah chho a, tih hlawhtlin ngei a nih a rinawm a,

A pathumnaah chuan hriselna ngai pawimawha budget-a sum awmsa bakah kan sorkar in flagship programe SEDP hnuaiah hriselna kawnga kan indaihlohna phuhruk nan doctor leh nurse lak belhna tur atan cheng nuai 5,000 lai mai han dah te hi a lawmawm hlein ka hria. Khawpuiah hi chuan harsatna awm bawk mahse hmunpui te a nih avangin kan mamawh em em lo va, thingtlang lam Zokhaw lam tan a lawmawmin kan lo welcome viau ang tih a rin theih a. Tin, zirtirtu indaih lohna avanga Zoram hmun hrang hranga kan sikul ten harsatna an neih chu kan hre sa vek a chuvangin he budget-a zirna kawnga zirtirtu te indaihlohna atana cheng nuai 3,000 lai dah te hian kan budget hian zirna lam ah pawh hma kan sawnna tur leh zirna tha kan neih a duh tak tak niin a lang a. He budget in mirethei leh harsa zawk te thingtlanga zirna chhiat zia kan sawi fo te a lo thatna tur atan budget hian chu lam chu a hawi niin ka hria a, a lawmawm hlein ka hria. Pu Speaker, ka lawm e.

SPEAKER : Pu Andrew H. Thangliana i lo sawm ang.

Pu ANDREW H. THANGLIANA : Pu Speaker, ka lawm e, hun hi a laklawh viau tawh mai a, mahse min sawi zawh tir thei hram ang chu maw. Kan receipt budget kha kan en chuan state chhung tax revenues-ah major Head of Accounts (a) State Goods and Service Tax, phok 105-naah khan ITC Cross Utilization of SGST and IGST tih kha kan hmu a. Helaiah kan Budget Estimate hi nuai 27,500 a ni a. Kum hmasa lam kan en chuan 2,500 chauh a ni. A punna hi a let 11 deuh thaw a ni a. ITC (Input Tax Credit) tih hi kan hre tlang a, hrelo te pawh kan awm thoin ka ring sumdawng mi tan lo chuan. State pawnlam atanga bungrua kan lak luh te a tir ah company a ni emaw sorkar a chhun luh tur input tax kan pe thin a, chulai chu Input Tax tiin kan lam mai a ni. Chu chhiah kan pek lawk te chu bungrua kan hralh huna

a value kan belh dan azira tax kan pek leh hun ah output tax liability kan neih, tax pek leh tur a kha ITC kan tih, Input Tax Credit hi kan va claim thin a ni. Chung chu a set off nan khan ITC hi a awm a ni tih kha kan hriat tlan atan ka han sawi hmasa a. Chu chu tun financial year kan hman meka bungrua kan state-in a chawk luh tur leh hralh tur te hi a pung viau dawn em ni ang ka ti deuh va? Kum hmasa lama estimate 2500 chauh kha 27500-a an kai chho ta dawrh hi eng atanga teh nge ni ang tih kha hriat a chakawm ka ti a, engtia chhut nge ni ang tih kha a hmasaah chuan ka han sawi lang ve duh hrim hrim a .

Tin, pahnihna atan, taxes on vehicles receipt budget bu kha kan ken chuan phek 8-naah khan kan hmu a. Major head of account, taxes on vehicles 102-na 'Receipt under the state motor vehicles taxation Act' hi nuai 1700 budget estimate a ni a. Kum hmasa lamah 1600 a ni a. A sanna hi nuai za lai a ni tih kan hria a, khalai kha a doubtful ka'n tih leh mai mai chu – tunah hian kan sorkar tharin one time tax, one time vehicle road tax kan la tawh dawn bawk si lova. Chutiang a nih chuan kan source tha ber, ti mai ang he kan road tax tuna kan hman mek hi nikum hmasa lamah te kan hman tawh aia tihhnam a nih si chuan, helai budget rawn pung ta hluai pawh hi eng nge a awmzia ni ang ? Engtinnghe hei hi a ngai, a ngai anih loh pawhin a tlahniam zawk turah ka ngaih deuh laiin helai hian a pung zawngin kan dah leh si a. Helai hi khawi atangin nge revenue hi kan hmuh ang tih pawh hi hriat a chakawm ka ti.

Pakhat lehah chuan – State Owned Tax Revenue, Major Head of Accounts, Water Supply and Sanitation kha kan en chuan Water Supply and Sanitation hnuaiah water supply a awm a. No. 102 - Receipt from rural water supply scheme tihah khan budget estimate rawn pung ta hluai kan hmu bawk a ni. Nikuma Estimates te, Revise Estimates te nuai 100 a nih laiin tunah nuai 500 a ni ta dawrh mai a. Helai hian tui bill te tihsan te kan sawi a nichinah khan, chungte pawh a source pakhat lo ni dawn ta sela. A bik takin hei pheh hi chu Rural Water Supply Scheme a ni lehngal a, hemi atana kan source tura pawh hi ngaihtuah tham a awmin ka hria a. Hetia a let 4/5 deuhthawa pung chho mai hi hriatchian a chakawm ka ti khawp mai.

Tin, thil pakhat hemi kaihnawih ka sawi duh chu – rindan leh ngaihdan ka lo nei ve a, khunglai kan bial chhungah te pawh a ni tho va. Tuna rural area-a public point a tui la thin ho hi public point te tihtawp veka mahni household theuha tui connection peka, bill te pawh chawitir ve tumna a awm niin kan lo hria a. Tin, ka bial chhung a bik takin Thingdawl khaw chhungah hengte pawh hi rawn hman an tum a, implement an tum niawm tak a ni. Amaherawhchu, khawtlang mipuiin ‘kan la zo lo ve’ an tih avangin delay status-ah a awm mek niin ka hria a. A chhan chu an ngaihdan pawh an la la chauh a, hriatthiampui an ngaihna chu E- Cluster te emaw kan siam a, khami atanga an zu zawm lehna tur pipe connection te leh thil dang charge neuh neuh kha zo dawn lova an inhriat vang a ni deuh ber a ni. Tin, meter man te chawi a lo ngai ang a, E-Cluster atanga hmun hla deuh zawka awm tan pheih chuan an senso tur a tlangpui a rate an han hriatthiam danah cheng 10,000 dawn dawn te leh a aia tam te pawh chawi belh tura inngai an nih avangin an ngaingam lo deuh ni berin a hriat a. Hemi chungchangah hian man mang lova a hming deuh chauha hemi programme hi kan kalpui dawn a nih chuan pipe te pawh han fit sak theih dan awm sela, a tui bill ngawr ngawr te hi chu pek an harsat pawh ka ring lova. Chung chu sorkar hian he state own non tax revenue kan han tih receipt of water supply scheme atan kalpui a tum ni turah ka ngai a, kha pawisa rawn lut tur neuh neuh te ngaihtuahin. Chungte pawh chu House hian ngaihtuahnaah neih chi niin ka ngai a ni.

A tawpna berah chuan hmannah district pathum kan neih tur chungchangah lawmpuina te pawh kan sawi tlang tawh a, resolution te pawh kan passed tawh a ni a. Chutihlaia ka rilrua lian em em chu – district thar neih belh hi a khaw mipuite leh khinglai mite tan chuan a tha em em a. District-in a kaihnawih tam tak a awm a, D.C. office te emaw, bangalow han sak ngawt kha district neihna a ni lo tih kan hre vek a. District hnuaiah Sub-Division te an awm a. Kan Sub-Division te an tlabal em em mai a, a bik takin mahni bial han sawi leh thin ila, Kawnpui-ah te pawh SDO(Civil) tunhnai teah a rawn function ve a, a hma zawngin BDO-in min kep thin a ni. chutiang chu kan dinhmun a ni a, chuan kan SDO(Civil) chu a rawn thu ve a, quarter pawh nei lovin tun thlengin a awm a, khatiang kha kan

dinhmun a ni. Bial dangah pawh tam tak a awmin ka ring a. Tuna kan neihsa te district thar kan neih turah te hian kan neihsa te thawmthat emaw, tihchangtlun hi kan ngaihthah palh ang tih kan House hian ka hlau takzet a ni tih kha a tawp nan ka sawi duh a. He budget bik hrim hrimah hi chuan tha taka kan kalpui theih ka duhsakin kan sorkar pawh duhsakna ka hlan a ni e. Ka lawm e.

PU C. NGUNLIANCHUNGA (CHAIRMAN) : Tunge sawi leh ang?
Dr. Vanlaltanpuia i lo sawm ang.

Dr. VANLALTANPUIA : Pu Chairman, ka lawm e. Vawiinah hian 2019 – 2020-a Mizoram pawisa hman tur he House-a vaibelchhe 10,692.30 rawn pharh a ni hi a lawmawm ka ti a. Finance Minister zahawm tak kan Chief Minister ni bawk in a rawn pharh dan form te hi a fakawm ka ti a. Vawiinah hian kan budget tlangpui thenkhat te han sawi ka duh a. Tin, nakinah kan sawiho hun a la rei dawn tho avangin Pu Chairman, kan ngaih mawh zawng te, kan ngaih pawimawh zawng te leh kan bial chhung related thil te chu chik takin kan la emphasize ang a. Amaherawhchu, vawiina ka rawn din hmasak hrim hrimah hian general discussion a nih angin, he budget present a nih dan hi a lawmawm ka ti em mai a, hei hi keini mimawl ho tan leh Finance lamah te, budgeting lamah te mithiam ni lemlo tan pawh a hmuh theih tur thil hlu tam tak a rawn tarlang a, hei hi nidangah pawh kan tih ngai lutuk loh thil tam tak a langin ka hria a, chungte chu han highlight ka duh a.

Central-ah Planning Commission thiah a nih hnuin Niti-Aayog tih a lo ding ta a, chutah chuan state tin te leh kan budget system-ah hian autonomy, mahnia thuneihna thuk tak pek kan nih thu te chiang takin he budget-ah hian a rawn langin ka hria a, chungah chuan a hmaa head-wise a budget lo kal thin plan leh non plan-a then thin dichotomy fel tak awma, in hman pawlh hleih theih loh thu te khan min tibuai thin a. A bik takin keini state rethei te phei chu Pu Chairman, kan buai em em thin a, a chhan chu kan plan fund te a tlem em em thin a, kan head of account kha fel taka siam a lo ni a, inpawh pawlh theih loh te, in zen tawn theih loh te tih a lo ni a. Vawiina Niti-Aayog-in kan budget hrim hrim te pawh autonomy, mahnia

thunehna minrawn pekthu te arawn tarlang hi a lawmawm ka ti a. Chung zingah chuan share of taxes te, post devolution, revenue deficit grant te, untied fund kan ti a, a tul tula kan pawh theih tur amah kan Chief Minister tawngkam takin thingkhawnpui a kan dah theih tur te hi a lawmawm ka ti a. Chu chuan Minister te leh MLA te inkarah pawh inthlau lutuk lovin MLA te pawhin kan mamawh te kan bial tan te leh ram tana kan mamawh te pawh kha allocations mumal taka lo awm thin te piahlahmah khan kan bial tan leh mipuite tan a tlachawpin kan dil theih tur, a zempui a han awm thei tur hi lawmawm ka ti a. He untied fund te hi untied fund kan tih piahlahmah khan tam tak min la dah sak dawn avangin hei hian keini ang state rethei leh disaster prone areas ni zual bik tan te phei chuan mamawha kan lak zung zung theih tur arawn pe hi lawmawm ka ti a. Hei hi kan budget-ah hian chiang taka tarlan a ni hi lawmawm ka ti a ni.

Tin, state rethei kan nih avangin kan pawisa puk theihna tur hmun te NABARD te, NCDC loan kan tih te, open market borrowing hmang te leh block loan hmang te in he kan budget tih chak a lo ni thei tur te leh kan sum harsatna hrang hrang puhruk a ni thei tur tarlanna hi a lawmawm ka ti a.

Tin, keini rorel khawlah te kan tel hma pawha kan rilru lo ti hah ve em em tu kan state liabilities, kan leiba pung chak lutuk thin te, eng emaw hun atangin kan ministry hmasa te pawh fak an phu hlein ka hria a, kan Finance Minister te leh kan ministry hnuhnungah te pawh he kan liabilities hi a hniam zawngin a lo kal ta zel mai te hi a lawmawm ka ti a. 2015-2016-ah 41.77% a ni a, 2016-2017-ah 41.09% a a lo tlahniam te leh 2017-2018-ah 41.15% a a lo tlahniam te, 2018-2019 kum liam ta ah khan 35.89% laiin kan state leiba a lo tlahniam ta tih kan hmu hi a lawmawm kan ti khawp mai a, he budget pawh hian chumi tlakhniam zelna tur chu arawn address chiangin ka hria a ni.

Tin, he budget-ah hian Centrally Sponsored Scheme (CSS) kan tih te kan do let a ngai thin ta a, project/target bik neia kan pawisa lakchhuahna thinah te hian matching share-ah kan buai em em thin a, fund tam tak hi matching share kan pek loh avanga a huna kan pawisa grant, fund te kan

hmuh theih loh a tam em em thin a, chumi do letna tur chu chiang tak maia hetia a han dah kalh mai thu kan han hmu hi a lawmawm ka ti a. Chumi awmzia chu Centrally Sponsored Scheme kan lak tur hrang hrang a then chu 90:10 tih te, 90:20 tih te, 90:30 tih te, khang kan do let tur tam taka pawisa kan thawh tur tam ho chi, kan zen ngam loh, kan khawih ve ngam loh ang te kha tam tak kan lak belh thei dawn niin a lang a. Chuvang chuan he budget-a hetiang tarlan a ni hi a lawmawm ka ti em em a ni.

Tin, NLCPR te leh North Eastern Areas Development Fund kan tih te, DoNER te leh NEC kaltlanga kan hmuh theih ho te pawh chiang taka tarlan a lo ni a, chumi atana matching share tur he budget-ah hian dah a lo ni hi kan Finance Minister hi management a lo thiam khawpin ka hria a, management thuk tak a rawn dah hi a lawmawm ka ti a ni.

Tin, he kan budget-ah hian Mizoram pumpuiin kan hriat theih tura kan GSDP, state economy dinhmun dik taka tarlang thin tu Gross State Domestic Product kan tih te tunah hian national level a 12.33% aia kan state domestic product 16.15-a a lo pung hi a lawmawm ka ti a, keini Mizoram state rethei te te heti hian hmasawna rahbi rapin a lo pung chho ta a, hma kan lo sawn ta hi a lawmawm ka ti a. He ministry thar pawh hian chu chona thar chu GSDP tipung zel thei tur te, kan fiscal deficit te leh liabilites ti tlem thei tur atan te leh, khang ang fiscal deficit leh reform kan lak theihna tur atana challenge, chona thar kan lak hi a tul hle dawnin ka hre bawk a ni.

Tin, thil lawmawm em em he budget-a lo lang chu kan revenue expenditure aia revenue surplus crore 1443-a a han pung hi, kan nei tam hi a lawmawm ka ti hle mai a, tute emaw chhuan mang rorel an tih anga mahni lakluh aia kan thawhchhuah te, kan hmanral te a tam hian a fuhlo em em a, he budget-ah hian chutiang ni lovin kan state hian awmze nei takin hmalam a pan mek a ni tih han hmuh hi a lawmawm em em a ni.

A dawt leha chuan thalaite address thei tur te, skill development kan tih kut themthiam lamah te kan ram a than theihna turin kan human resources, kan manpower development lakna tur atana skills leh entrepreneurship atan nuai 500 dah a han ni ve hrim hrim te hi a lawmawm ka ti a, *(Pu C. Ngunlianchnunga in the*

Speaker's Chair) hei hi duhthusam ah chuan a la tam lo deuh pawh a ni mai thei; (*Chairman: I hun a tawp a, kan hun hi a laklawh a, chuvangin minute 2 leh a chanve pek belh i ni e*) Ka lawm e, Pu Chairman. Hei hi thalaite tan kawng thar, bungthar kan keu dawn niin ka hria a, kut themthiamna thil te he lamah hian kan la thei dawn a, kan thalai ten mahnia eizawna, ei dapna tur sorkarin a pui nasa dawn a ni tih thu kan budget-ah a lo lang hi a lawmawm ka ti em em baw a ni.

A dawt leha chuan SEDP, sorkar-in a flagship programme-a hma a lak turah hian nuai 75,000 dah a ni hi lawmawm ka ti a, hei hian Mizoram economic growth nasa takin min pek ka ring a. Nichina member zahawm tak Pu VL Zaithanzama sawi ang khan MRI wawi khat han tihna mai te pawh sem ral ringawt ni lovin heng hian kan state economic growth min pe thei tura hmalakna tur pawisa he ti zat dah a lo ni hi a lawmawm ka ti khawp mai a, hei hian Mizoram hi a chawikang ngei dawnin ka hria a ni. Tin, chhung tin te Pu Chairman, kan mangan em em thinna medical reimbursement lam ah te, Health Care lam ah te he sorkarin he budget-ah hian nasa takin tan lak na tur a rawn tarlan hi a lawmawm em em baw a, chungah chuan keini mirethei ten CT scan vawikhat tihna te pawh kan harsa em em thin a, chung ang te su kiang turin medical health facility tha zawk te, Health Care system tha zawk te a rawn duang a, chungah chuan pawisa hi an rawn dah tam em em mai a. Chungte chu chhung tin, thingtlang amite pawhin sorkar an chhawr thei dawn a, kan dam loh mangan nikhua hian sorkar atangin tanpuina health care facility tha tak kan dawng tur hi a lawmawm em em baw a ni.

Tin, Mizoram pumpuiin kan intawm thin kan kawngpui, kan chakkhai lakna chhe lutuk thin atan nuai 15,000 lai mai road fund atan dah a lo ni te hi a lawmawm ka ti a, a thlamuan thlak em em mai a. Heng zawng zawng rawn duangtu kan Chief Minister zahawm tak, Finance Minister ni baw hi fak a phu ka ti a, he kan budget hi a thlamuan thlak tak zet zet in ka hria a ni. Ka lawm e.

CHAIRMAN : Tunge sawi ve leh ang le? Minutes sawm leh tlem a la awm a, pakhat sawina hun a la awm e. Sawi tur kan awm tawh loh chuan discussion kan ti tawp mai dawn em ni, sawi duh in awm tawh loh chuan? General discussion hun a ni a, naktuk nen hun kan la nei a, sawi duh in awm tawh loh chuan chawhnu a la awm leh nghal a, han ti ula pakhat sawina hun a la awm e. Aw le, Dr. Vanlalhlana member zahawm tak sawi turin i lo sawm ang.

Dr. VANLALTHLANA : Pu Chairman, ka lawm e. Chawhnu lama sawiah ka lo inkhek deuh a, sawi tur hi ka ngah ang reng a, amaherawh chu tlem hun pek belh theih ka ni deuh dawn hmel a, minutes sawm chiah chiah lo deuh a la awm a.

Kumin budget hi ka lo nghakhlel tawh khawp mai a, 2005 vel chho atang khan Mizoram budget hi ka lo thlir tawh thin a, TV leh AIR-ah te kan lo sawi tawh thin a, helaiah a pawn atang ni lo, a chhungah ngei kan sawi ve tur hi a lawmawm ka ti khawp mai a, phur pawh ka phur a, thil chi hrang hrang sawi duh ka nei a. A hmasaah chuan kan budget chungchangah hei hi ni zawk ta se tih emaw, kan statistic chungchang tlem han sawi ka duh a. Sorkar sum leh pai dinhmun that leh that loh teh fung hi kan GSDP te, kan state own revenue ang chi te, fiscal deficit leh sorkar leiba chungchang te a ni a.

Kan GSDP hi kum 2015-16 khan a rawn kang chho thut mai a, kum dang zawng ah national per capita income average kan pha ngailo a, kha kum khan kan pha ta a, a then phei chuan an programme vang a ni te an ti a, kan inhniai viau nghe nghe a, kha mi tum khan. Forestry and logging-ah hian kan sum hmuh kha 2013-14-ah nuai hlir 37,987 a nih laiin 2014-15 ah khan nuai angin nuai 22,275 ah a rawn pung chho a ni, kan sum hmuh kha kan GSDP ah. A punna rate hi 432.48 a ni a, kan GSDP pawh, kan per capita income pawh a ti sang awk a nih kha. Amaherawhchu kum 2016-17 budget han en ila, receipt lamah khan forest produced a tam a nih chuan kan receipt pawh a tam tur a ni a, royalty pawh awm tur a ni a, khatah khan a punna a tam leh si lova, 400 vela a pun laiin kan revenue erawh chu a pung vak lem si lo va, kha thil kha engnge ni ta ang tih ngaihtuahna a awm a. Royalty pung tam lovin, dawhkan lam atangin ka hriat dan phei chuan state of forest report-ah kan forest hi, ramngaw hi 2015 report ah khan sq. km 306 in a tla hniam a. Tin, 2017 khan sq. kms 531 in a tlahniam bawk a ni. Ramngaw a chereu nasa hle. Kha kan ramngaw a chereuna kha a hlut zawng chhut chhuah a ni a, thingtuah atan te, thingzai atan te chuti zat chu a ni thei ang e tia kan economy-a vawm luh ni ta mai niin ka hria. He thil ah hian Economic and Statistic pawh an buai hle a, tum 2 lai Forest Department-ah pawh an intir tih pawh ka lo hria a. Chuvang chuan kan GSDP tun ami pawh hi a rintlak meuh em tih hi ngaihtuahna sen a ngai a. Kan GSDP thar ber turah khan a nuai hlirin nuai 3 leh tih a rawn ni dawn a consent price-ah khan. Amaherawhchu kan royalty erawh chu kum 2012-2013 vela kan lak turin

en khan a inang deuh reng a ni, a punna a tam lo. He thil hi ngaihtuah chian a ngaiin ka hria a, kan GSDP hi a dik tak a ni em tih te. Tin, GSDP punna chumi zat chu a ni, zaa sawm aia tamin a pung a, a lawmawm hle kan ti a. Kan GSDP tipungtute hi chu electric bill tih te, heng ho atang hian 28% te, 30% ten an thang chho awk awk a. Tin, public administration-ah hlawhte a pung a, khang ho khan a pawt kal mai mai a ni.

Manufacturing lampangah chuan 4% te, 5% te chauh ten kan thang thin a, helamah hian tan a tul khawp mai tih hi ka sawi duh a, kan nihna dik tak ka'n hailang duh a. State owned tax revenue-ah khan kan hre theuh tawh a, zu chhiah tih tawp a ni a, life time tax on vehicle tih tawp a ni a. Amaherawhchu kan tax revenue kha a pung tlat lawi si a, khatah khan tan viau a ngai dawn a, sorkar pawh thil siam chhuahna lamah pawh kan tan viau a ngai dawn, hmalakna tur a lian viauin ka ring.

Tin, GST-ah khan Input Tax Credit (ITC), utilization of GST and IGST tih kha nikumah nuai 2500 dah a ni a. Kuminah hian lakluh turah hian nuai 2500 atangin nuai 27500-ah tihpun a ni a, kha kha department lam pawh an tan viau a ngaiin ka ring a. 2500 atanga 27500-a tipung tur chuan kan lak luh te tih tam a ngai a, kan production tih tam te pawh a ngai a, kan consumption te pawh tih tam a ngaiin ka ring a. Kumin kum tirah GST dan tlema tih danglam a ni a, kha khan a rawn effect nge ka hrethiam chiah lova, kan tan viau a ngai a ni.

State debt chungchang hi ka buaipuina a rei ve tawh a, Niti Aayog-in an website-ah khan kum 2001 atangin state hrang hrang leiba an rawn tilang a. Kum 2001 atanga 2008-ah khan tuna kan sorkar mekin sorkar-na hun an chan lai khan, kan state leiba kha a average-in 92% a ni a, state dang zawng zawng kha an debt ka'n lakin average-ah 38% chauh a lo a ni a. Kum 2004 atanga 2008 inkarah khan 100% kan pel a ni, kan GSDP atangin, thawh chhuah atangin teh thin a ni a. GSDP atanga kan debt-a kha a sang em em a, state dang tan chuan a nuizathlak viau mai thei a ni.

Arunachal Pradesh-in kum 2009-ah za an rawn kai ve awk a, mahse a kum lebah 42%-ah an tla lehngal a. Keini chu a zawnin kum 5 tawp mai 100-ah percent kan chho a, kha thil kha state dangah hmuh zen zen loh a ni a, amaherawhchu kan Finance Minister-in kan debt pawh a rawn tihnam a, a lawmawm khawp mai a. Chumi ka sawi rual chuan mid term policy-ah khan nakum leh a kum lebah chuan a

pung turin a rawn dah leh tlat mai! Sorkar hmasain theihtawp an lo chhuah a, an sorkar tirh atangin an tihniam char char a, 32% an ti thla thei a ni a. Tunah hian a pun lam kan chho leh a nih chuan leiba lamah kan buai leh ang tih a hlauhawm khawp mai a, hetah hian kan Finance Minister pawh hi theihtawp han chhuah se, tan han la se ka duh khawp mai.

Mizoram hi education lamah state dang nena tehkhin pawhin kan budget atangin a dah tam ber dawttu kan ni a, Sikkim a sang ber an ni a. Tun budget-ah pawh hian Education-ah tam tak dah leh a ni a, a lawmawm khawp mai a, kan zirtirtu te, Education lama thawktute pawh hian result tha kan neih theih nan kan Finance Minister-in a duhsakna te pawh hi bawhzuia theihtawp an chhuah hi a tulin ka hria. Tin, Sports lamah te pawh tikhan pawisa dah a ni a, budget speech-ah khan ka lo chhiar fuh lo nge ka hre lova, ka hmu zo miah lo a. Budget neih hian tunah hian UNO hian ‘sustainable development goals’ a ti a, ram hrang hrangin target an insiam a, chumi chu thlen an tum a. Khati lam hawi zawnga budget han pawh her tumna emaw, han sawi lanna kha a awm miah lova, kha kha ka ui khawp mai a. SDG hi kan ngaihvena heti lampang hi budget-ah te pawh sawi lan a, kan neih ngei theih nana hmalak hi a pawimawhin ka hria.

Tin, Planning & Programme Implementation-ah hian SEDP kha dah a ni chiah lova, Planning hnuai METNOG kan tih leh entrepreneurship development scheme kan tihah hian SEDP hmanga thalaite mahnia eizawng duh te, mahnia ke pen duh te, leirem an rah theih nan te leh hma an sawn theih nan SEDP hi hman tangkai a tha khawpin ka hria a. Dah a ni lemlo a, Labour & Employment-ah khan dah a ni a, amaherawhchu Unstarred Question-a ka zawhnaah khan entrepreneurship lampanga hma lak an tumna ve thung chu, khati lam hawi zawng kha a ni chiah lova, ITI lampangah te a ni a. He lampangah hian tan kan lak a ngai khawp mai. Tun tum kan budget speech hi a felfai khawpin ka hria a, hriatthiam a awl a. Budget hrethiam vak lo tan pawh han inchhiar belh hlek chuan a hriat theih mai zel a, a lawmawm ka ti a. Kan sorkar-in theihtawp an chhuah ang a, kan ram neih chhun Mizoram hi kan sum neih chhun hmang hian tha taka an kaihhruai theih ka beisei a, duhsakna ka hlan bawke. Ka lawm e.

PU C. NGUNLIANCHUNGA : Hun tlem a la awm a, tikhan a dar 1:00 a ni a, kan chawl ang a, dar 2:00-ah session kan chhunzawm leh dawn nia.

RECESS TILL 2:00 PM**2:00 PM**

DEPUTY SPEAKER : Kan tan leh dawn tawh ang a, chawhma lamah mi 7 in an sawi a. Kan sawiho tan hmaa ka sawi duh chu, Mizoram rorelna sang ber a ni a, thingtlang hmun hrang hrangah min lo en a ni a, a then chu lekhathiam te, lehkha thiamlo te kan ni a. Chuvangin a theih hram chuan keimahni Mizo tawng kha hman hram tum ila, loh theih loha sap tawng word hman a ngai a nih kha chuan sawi theih a ni lo va. Mahse Mizo tawnga kan neih ve kha chu Mizo tawngin sawi hram hram tum ila. Chu chuan kan sawihona kan hriatthiamna kawngah hlawhtlinna min pe ang tih ka beisei a.

Tin, chumai piah lamah kan tawng hi keini lo chu han humhalh tur kan awm chuang lova. Chuvang chuan a theih chen chen chu i hmang ang u tih kha vawiinah member zahawm tak tak te kan han insawm a ni e.

Tunge sawi ang le? Pu ZR Thiamsanga, member zahawm tak i lo sawm ang u.

Dr. ZR. THIAM SANGA : Pu Deputy Speaker, ka lawm e. A hmasa berin Mizoram budget 2019-2020 chungchang sawi ve thei tura ka rawn ding ve hi ka lawm khawp mai a. Tin, in hriat angin keini te hi chu Medical mi kan ni a, damlo kan en a, chhul kan paih a, chhul paih atanga helai House zahawm taka Budget Session-a budget chungchang kan han sawi ve mai ta te hi lehlamah chuan kan lo sawi sual nak nak a nih pawhin min lo hriatthiam ka duh a. A chhan chu, first timer kan ni a, thil kan la inzir hman lova, chuti chung chung chuan Finance Department changtu kan Chief Minister zahawm takin budget a rawn putluh hi keini mimawl tan, first timer tan pawh hian han en mai pawh hian a simple a, chhiar a nuam a, hriatthiam a awl a, a lawmawm hlein ka hria a. I veilam amite pawh hian tha an ti niin ka hria. Group Leader, MLA zahawm tak Pu Zodintluanga pawh khan a tha a tih ka ring a, a hun pawh kha a rawn hmang zo lova, minute 5 lai mai spare midangte tana a han pe thei te pawh kha sawisel tur an neilo niin ka hria a, kan hlimtlang a ni, vawiinah hian, kan nui dar darin ka hria a, a lawmawm khawp mai.

Tichuan, a hmasa ber atan chuan kan sorkar flagship programme pawimawh tak mai pakhat SEDP kalpui nan sorkarin budget pharh hmasak berah, a bul tan nan

cheng nuai 75,000 lai mai a dahte hi a lawmawm khawpin ka hria a. Heng hi mirethei te, thingtlang mite a bik takin kan budget hian a thleng pha dawn tih a Chiang hlein ka hria. Tin, nichinah khan member zahawm tak tak te khan SEDP-ah nuai 3 a lang lo, sem tur tih a ni si a, an han ti a. Hei hi Finance changtu kan Chief Minister zahawm takin a sawi ang khan, 'hei hi a chi tur a ni' a tih kha a dik hle in ka hria a. Hemi hmang hian thil tam tak kan han ti chho dawn a ni a, SEDP atang hian miin a takin hna an thawk ang a, cheng sing 2/3 kha chu an hmu chhuak ngei ngei ang a, a taka an thawh chuan. Sing 3 mai nilovin, sing 5 pawh kha an la dawng dawnin ka hria, kan budget atang hian. Chuvangin, a hmahruai atan hetiang pawisa tam tak SEDP atana a rawn dah hi lawmawm ka ti. SEDP atan nuai thum aia tlem lo an tih pawh kha a tak ramah nakinah chuan a la chang ngei dawn tih a Chiang hle in ka hria.

Tin, tuna kan sorkar hi a lawmawm ka ti a, sorkar hmasa in thil tha a lo tih, NLUP a lo kalpui tawhte chhawmdawl nan cheng nuai 11,000 lai mai an dah te pawh kha he sorkar hi chu belh tlak a niin ka hria a. Sorkar hmasa thil tha lo tih tawh te chhunzawm duhna rilru a awm hrim hrim hi a lawmawm ka ti a, hetiang hi kan kalphung zel tur ni pawhin ka ngai Pu Dy. Speaker.

Tichuan, Pu Dy. Speaker, khawvel leh India sorkar pawhin a ngaih pawimawh, nichinah kan sawi tawh a, skill development chungchangah Mizo thalaite pawh ram chung leh pawna hna thawk thei tur han chherchhuahna kawngah khan pawisa tam tak te a rawn dah a, cheng nuai 500 lai mai a dah te kha a ropui hlein ka hria.

Tin, sawi loh theih loh chu he budget atang hian kan sorkar hian Health Care System a ngai pawimawh hi mipuite tan a pawimawh hlein ka hria. Mihausa leh mirethei ber pawhin kan mamawh, tupawhin kan mamawh chu Health Care System tha hi a ni. Chu chu sorkar hmasa atang tawh khan MNF sorkar khan he Health Care System hi a ngaih pawimawh em em a, bul a rawn tan kha a ni a. Asian Development Bank atangte khan pawisa a puk a, tichuan tunah hian khang kal chho zel kha kum 10 a rawn ni a, khamia pung awm pawh kha tunah hian cheng vaibelchhe 150 chuang a ni tawh a ni. Chumi a corpus atana, Health Care atana tun kan budget-a cheng vaibelchhe 50 rawn lang te hi a ropui khawpin ka hria.

Chumai ni lovin, tunah Medical Re-imburement chungchangah te pawh kan buai thin a, chumi assistance atan chuan tunah hian cheng vaibelchhe 20 a rawn lang ta te hi he kan sorkar hian Health Care a ngaih pawimawh zia, mirethei te, damlo inenkawl na neilo a ngaih pawimawh zia a rawn lang hlein ka hria, a va han lawmawm tak em! Chubakah chuan Health Department indaihlohna he sorkar hian a hre chiang em em a, kan hriselna a that loh chuan ram Hausa pawh ni ila awmzia a nei lo. Ram changkang tehna ber chu kan Health Index hi a ni. Chuvang chuan tunah hian vaibelchhe 50, doctor leh nurse te indaihlohna phuhruk tura a dah te hi a ropui hlein ka hria a, kut ben hluah hluahna tham niin ka hria Pu Speaker.

Doctor te leh nurse te indaihloh zia chu kan hria a, tunah hian Union Public Health Standard-ah chuan nurse te hian damlo 4 an enkawl tur a ni tih te, ICU-ah phei chuan damlo 1 hi Nurse 1-in an enkawl tur a ni tih a ni. Tuna kan dinmun, kan hospital lian ber Civil Hospital-ah pawh sawn nurse 1 hian damlo 15 te an la enkawl a ni. Tin, kan PHC-ah te pawh doctor awm lohna a la awm nual. Thingtlang mi, mi hrisel lo, damlo harsa zawk khawpuia kal harsa si te tana doctor leh nurse te lakna tur pawisa a han ruahman te hi a ropui hle a ni.

Tin, kan sorkar-in zirna a ngaipawimawh a, zirna hi a pawimawh reng a, Education atang lo hi chuan kan ram hi a changkang dawn lo tih a chiang a, chuvang chuan priority-ah Education Department a rawn dah te hi a lawmawm hle a. Zirtirtu indaihlo lakna tura cheng nuai 3,000 lai mai a dah te hi a va lawmawm em! Sawi tur a tam si a, nichinah khan Pu Deputy Speaker, zawh belhna hunah khan ka chang ta si lo a, tlem chu min lo ngaithiam ang chu maw! Sawi tur ka ngah a ni tunah hian, he kan budget hi a tha a, sawi pawh a nuam a. Tin, Centrally Sponsored Scheme (CSS) kan tih te, NABARD leh agency dang dang kaltlanga hmasawna hna tam zawk kan thawh theihna tura state matching share atana cheng nuai 17,000 lai a dah te pawh hian he sorkar hian thil tum chu a nei a ni tih a chiang a ni.

Tin, tunah hian kan state GSDP atanga kan leiba neih zat 35.89 atanga 32.66- a tla tur anga ngaih hi a taka a chang thei a nih phei chuan a lawmawm hle dawn a. Chuvang chuan hetiang ang a han awm te hi a lawmawm a. A tawp ber ah chuan Pu Deputy Speaker, kan revenue expenditure cheng vaibelchhe 8403, kan revenue receipt cheng vaibelchhe 9846.99, a tamna hi cheng vaibelchhe 1143.47 a nih avangin revenue surplus cheng vaibelchhe 1443.77 kan nei thei tur hi a lawmawm

tak zet a ni. Hemi awmzia chu kan sorkar hian hna tak tak hemi budget atang hian a thawk dawn a ni tih a chiang a ni. Chuvang chuan Pu Speaker, tuna kan budget pharh hi pawm mai ka support a ni e. Ka lawm e.

DEPUTY SPEAKER : Tunge kan sawm leh ang le? Dr.F.Lalnunmawia, MLA zahawm tak.

Dr. F.LALNUNMAWIA : Pu Deputy Speaker, ka lawm e. Member zahawm tak ten an sawi nual a, rin aiin kan chuh chak lo riau a, theihtawp chhuah in kan sawi ve ang a. Pu Deputy Speaker, tun tum hi budget pangngai discussion-a kan tel ve vawi khatna a ni a, ka hmaa member zahawm tak Dr. Z.R.Thiamsanga sawi ang khan sawi soal te pawh a hlauhawm duh khawp mai a, engemaw sawi soal palh kan nei a nih chuan in mi ngaihthiamna ka han dil nghal bawk a ni.

Pu Deputy Speaker, kan budget hi han thlir thuak hian a lawmawm hlein ka hria a, nikum lam atanga khaikhina a punna ringawt hi vaibelchhe 1019.66 a ni a, a lawmawm khawpin ka hria. Tin, hemi pum pui atanga hmasawna hna thawhna tur capital expenditure hi vaibelchhe 2288.78 a ni a, chu chu budget pum atanga chhut khan 21.40% a ni a, a nihna tur anga hman a nih chuan kum lo kal tur chhungin hmasawna tha tak tak kan hmu turah ka ngai a. Tin, chutih ruala thil lawmawm tak mai lo lang chu mipui phurrit tipung zawnga chhiah lakna tur a awm lo hi a lawmawm hlein ka hria a, mipui ten hun kalta khan chhiah tihpun avanga hatsatna hrang hrang an lo tawk tawh thin a. Motor chhiah chungchangah te, inhmun lo ram chhiah chungchangah te chhiah pung avanga harsatna, vuivaina a tam em em thin a nih kha. Amaherawhchu tun tum budget-ah erawh chuan mipui phurrit belhchhah zawnga chhiah lakna a awm lo hi a lawmawm tak zetin ka hria.

Tin, kan budget-ah hian kan GSDP thanna hi nikum atanga chhutin 16.15% a ni a, a lawmawm hlein ka hria a, hei hi India ram pum pui thanna aiin a tam zawk a ni. Chu chu thil lawmawm tak niin ka hria a, he kan budget thar buatsaihtu kan Chief Minister leh Finance Minister ni bawk zahawm tak hian Finance lam a thiamin ruahmanna tha tak mai ngaihtuah chhuak theia a awm hi, a fakawm tak zetin ka hria a, he a budget pharhah hian Zoram mipui tan lawmna tur tam tak a awmin ka hria a ni.

Tin, Pu Dy. Speaker, kan sorkar flagship programme SEDP hi kan sawi nawn lo thei lo a, flagship programme a nih miao avangin. Hemi atan hian kan sawi tawh angin ₹ 75,000 lakh dah a ni a, he ₹ 75,000 atang hian thil hrang hrangah sem darh leh a ni a. Budget speech-a kan hmuh tak ang khan a chung langsar deuh deuhah chuan han sawi nawn ve leh hrim hrim ka duh a. Kan sorkarin a ngaihpawimawh em em leh SEDP-ah pawh kan lo sawi fo tawh thin Health Care leh Education-ah te, Sport & Youth Services lamah te leh kawngpui chei that kawngah te hemi SEDP vek kha a ni a, SEDP-in a huam zau em em a. Chuvang chuan thil tam tak hemi chhungah hian dah a ni a. Health Care, medical re-imburement, damlo inenkawl na an dil leh theihna atana budget-ah sum indaihlohna phuhruk nan ₹ 2,000 lakh dah a ni te; tin, Health Care corpus fund kan tih, a pung awma kan dah thin belhchhah tura ₹ 5,000 lakh dah a ni thei a, a lawmawm tak zetin ka hria a. Hei hian indaihlohna tam tak a phuhruk turah kan beisei a ni.

Tin, kan hriat angin hmun hrang hrangah doctor leh nurse te an indaihlo em em a, heng indaihlohna phuhruk nan hian doctor leh nurse rawih belh nan ₹ 5,000 lakh dah a ni leh te hi thil lawmawm tak, a bik takin khawpui hlata awm mipuite, Zoram mipuite tan a thlamuanthlak hle dawnin ka hria a ni.

Tin, kan ngaihpawimawh em em thalaite dawmkanna kawngah Sport lamah SEDP hnuai hian ₹ 1,000 lakh dah a nih bakah sport lam thei mite lawmman atan tih phur nan incentive award, cash award atan ₹ 100 lakh dah a ni a. Tin, chu bakah chuan thalaite an mamawh, an thiamna tihpun nan Skill Development atan ₹ 500 lakh dah a ni baw k a. Hei hian thalaite sorkarin a ngaihsak zia a langin ka hria. Tin, heng hi tihpun tura peipun tur kha a ni a, hemi hi an dah mai bakah hian department ten nasa takin hemi tur hian an peipun te pawh beisei a ni.

Tin, sorkarin a ngaihpawimawh em em Elementary Education atan ₹ 3,000 lakh dah a ni pawh hi a lawmawm tak zetin ka hria. Kan sawi fo thin zirtirtu indaihlohna hmun hrang hranga indaihlohna phuhruk nan leh zirtirtu rawih belhna tura tih a ni a, hei bakah hian zirna lam pawh a that phah sawt ka beisei a ni.

Tin, kawngpui chei that nan ₹ 15,000 lakh SEDP atang khan dah a ni a. Chubakah budget pangngai atang khan ₹ 5,000 lakh dah a ni baw k a, hei hian nasa takin hna a thawk turah ka beisei a. Tuna kan kawng siam sa bak, kawng la siam hmabak tam tak heng hmang hian siam chhonzawm theih a nih ka beisei a ni. Tin,

Pu Dy. Speaker, kan SEDP normal fund kan ti a, SEDP a tul anga board hrang hrang ten hna an thawh theih nan kan CM zahawm tak leh kan Finance changtute bawkin ₹ 3,000 lakh a dah a, hei hi kan CM zahawm takin a sawi thin angin a chi tur, peipun tur kha a ni dawn a. He ₹ 30,000 lakh hi nasa taka peipun kan tum turah ka ngai a. Board leh hnathawktuten hemi hmang hian hna tam tak hmasawna hna ei leh bar intodelhna hna tam tak he SEDP normal fund ₹ 30,000 lakh kan dah hian hna a thawh ka beisei a ni.

Tin, Pu Dy. Speaker, he kan flagship SEDP-a sum daha ka lawm em em chu ₹ 11,000 lakh hi sorkar kalta in NEDP leh project dang a lo kalpui laklawh tawh chhunzawmna tur khan dah a ni a, a lawmawm hlein ka hria a. Sorkar hmasa thil tih tha leh chhunzawm tlakte chu he sorkar, kan CM zahawm tak Pu Zoramthanga sorkar hian chhunzawm a tum a ni tih kha a lo lang a, rilru zau tak pua hetiang ang budget-a a dah thei hi a lawmawm tak zetin ka hria a ni.

Tin, Pu Dy. Speaker, kan budget- a lawmawm em em ka tih chu state matching share atan ₹ 17,000 lakh hi budget atan dah a ni a. He ₹ 17,000 lakh hi sorkar laipui project lo kalte lo doletna tur matching share kha a ni dawn a. Kan puten an sawi angin a kawihsapir tur kha a ni a, hemi hmang hian sum tam tak hai chhuah kan tum dawn a, hei hian nasa takin hmasawna min thlenin ka ring a. Sorkar liamta ah te State matching share kan neih tawh loh avangin sum lo kal tur tam tak kan hmuh loh phah a, kan chan phah tawh a nih kha. Chuvang chuan he matching share tam zawk kan dah atang hian (Dy. Speaker : Minute 1 i la nei) ka zo tep e, Pu Dy. Speaker, sum, fund tam tak kan hmuh belh ka beisei a ni.

Tin, Pu Dy. Speaker, ka lawmna em em chu kan sorkar budget kan en hian kum kalta 2015-16 ah te, 16-17 leh 17-18 chhung khan kan leiba hi 41% zet kha kan budget atanga kan leiba kha a ni a. Tichuan 2018-19-ah hian 31.89% a ni a, tun tumah hian (Dy. Speaker : Kan hun a tawp a) 32.66%-ah a tla thla hniam leh a ni. Chumi awmzia chu kan state leiba hi a tlahniam a ni, a percent a chhut in, hei hi a lawmawm tak zetin ka hria a. Hemi leiba tihnam thei tura a ngaihna hria CM leh Finance Minister zahawm tak kan nei hi a thlamuamthlak tak zetin ka hria a. He sorkar thar budget hnuaiah hian ramin nasa takin hma a sawn thei ang a. He sum kan budget-a kan dah mai bakah hian haichhuah tur scheme, kawng hrang hrang atangin Mizoram budget piahlam atanga haichhuah tur tam tak kha awm dawn a. Chuvang

chuan, kan sorkar hruaituten kan hruaitu Chief Minister zahawm tak ho hian nasa takin hmasawna kan kalpui ka beisei a. He budget-ah hian ka lawm a, Mizoram mipuite pawh an lawm ve ka ring a ni. Ka lawm e.

DEPUTY SPEAKER : Tunge kan sawm leh ang le? Pu Lalrinsanga Ralte, MLA zahawm tak i lo sawm ang u.

PU LALRINSANGA RALTE : Pu Deputy Speaker, ka lawm e. Kumin financial year 2019-2020-a kan pawisa hman tur full budget kan han pharh thei ta hi a lawmawm hlein ka hria a. Hetiang a nih chuan kan sorkar-in hmalak a tumna te, a kalchhohpui dan tur leh a ngaihpawimawh zawng te kan hre chho thei ta a. Kan budget hmuhah hian lawmna tur tam tak a awmin ka hria a. Tin, kan Chief Minister zahawm tak, kan Finance Minister ni bawkin keini ang tan pawha hriatthiam theih tura budget a rawn siam hi a lawmawmin a ropui ka ti tak zet a ni.

Pu Deputy Speaker, a hmasa bera ka sawi duh chu revenue surplus kan nei chho zel thei hi a lawmawm hlein ka hria a. Kuminah pawh hian kan revenue surplus turah crore 1443.47 zet mai kan nei chho dawn a ni a. Hengte hi hmasawna hna thawh chhoh theihna tur atan awm thei turah ngai ila. Hetianga revenue surplus kan neih chhoh theihna tura kan budget rawn siamtuten ngaihtuahna fing tak mai leh fim taka an hmang hi a lawmawm hlein ka hria a ni.

Tin, Pu Deputy Speaker, kan economy pawhin hma a sawn chhoh zel thu kan hmu a, kum 2019-2020 chhunga kan GSDP chu vaibelchhe 25869.14 ni turin chhut a ni a. Chu chu kum 2018-2019 atanga a thanna hi 16.15% a ni. A lawmawm hlein ka hria a, hetiang ruahmanna siam thei kan Chief Minister zahawm tak hi a fakawm hlein ka hria a ni.

Tin, Pu Deputy Speaker, kan state own revenue pawh hi pung chho turin ruahmanna kan siam a, ti ti lengvakah te zu chhiah kan lak loh avanga kan revenue tlahniam tura ngaite an lo awm a ni thei a. Amaherawhchu, kan ram leh hnamin a mamawh loh, kohhran leh khawtlang, mipui pawhin kan chhiatpui zu chhiah tello hian revenue tisang thei tura ruahmanna kan Chief Minister zahawm takin a rawn siam hi a lawmawm hle a ni.

Tin, Pu Deputy Speaker, fiscal policy strategy statement kan hmu a. Helaiyah hian sawi ve duh ka neih chu fiscal policy for 2019-2020 tih tha deuh mai kan hmu a

helaiah hian thil pawimawh tak awmin ka hria a. Fourteenth Finance Commission khan state tin mai hi kan sum leh pai enkawl dan tur rules khauh tak leh tha tak mai min duan sak a. Chutah chuan fiscal deficit reng reng hi GSDP atanga teha 3% aiin a tam tur a ni lo a ti a. Amaherawhchu 0.25% chuan pelh phal a nih thu kan hmu tel a ni. Chumi pelh phal kan nih rual erawh chuan a kum leha sum kan puk theih tur kha kan fiscal deficit GSDP ratio kan neih atangin min chhut sak thung thu kan hmu bawk a ni.

Tin, pahnihnaah chuan state sorkar hian hmun dang dang atanga pawisa kan puk theihna hi kan revenue receipt pumpui atanga teha 10% aia tlem interest payment-a kan hman chuan GSDP 0.25%-a sum kan puk theih zat hi tihsan theih a nih tur thu kan hmu bawk a. Heta langchiang em em mai chu kan state inrelbawlina hi uluk taka kalpui a ngaih zia a rawn lang ta a. Chulaiah chuan vawiina kan budget han en hian kan budget leh a document ken tel hrang hrang atang hian hetiang a fimkhur tak leh kan state sum leh paia kan lo ziaawm theihna tura kan Finance Minister zahawm tak, kan Chief Minister ni bawkin hma a rawn la thiam hi ropui ka ti a, fakawm ka ti tak zet a ni.

Pu Deputy Speaker, kan state leiba chungchang hi tlem sawi ve ka duh bawk a. 2010-2015 inkar khan kan state leiba hi 9.13%-in a pung a ni. 2015-2016-ah phei kha chuan crore 6407.30 kan nei hman a nih kha. Kan ministry hmasate pawhin theihtawp an chhuah a, kan leiba a tlakhniam a, kan state leiba ti tlem zel tura theihtawp an chhuahna kha ropui ka ti a. Amaherawhchu, kan lo kal fuhlo chho rei nge ni kum 10 kalta chung pawh khan a tlahniam chak lo hle mai a, tun kumah phei chuan tam tak awm chho turah kan ngai a, crore 8447.92 lai awm turah kan ngai a ni. Chutihlai chuan kumina kan state leiba neih tura chhut hi GSDP atanga tehin 32.66% vel ni turah dah a ni a. Heti chung a GSDP atanga teh a kan fiscal deficit 2.02% a a ti tlahniam thei hi kan Chief Minister leh Finance Minister ni bawk Pu Zoramthanga sum leh pai enkawl thiam zia lanna niin ka hria a, a ropui ka ti takzet a ni.

Tin, Pu Deputy Speaker, kan budget buah hian thil ropui deuh mai rawn lang a awm a. MNF sorkar-in budget hmasa ber a rawn pharhah hian, kan policy lian ber SEDP a rawn telh a ni tih kan hmu nghal a. Helaia han sawi tel ka duh chu sorkar hmasa kha kan en tel lo thei lova, sorkar hmasa kha chuan kan

sorkar tukah cheng 1,00,000 kan sem ang tiin an sawi a, mahse an sorkar kum 2 hnulamah budget-ah an NLUP tur kha kan hmu hman chauh a ni. Chutichung chuan vawiinah chuan kan Chief Minister zahawm tak chuan fing tak maiin, a thutiama dingin, party manifesto tihlawhtling in, mirethei leh harsa zawk te dawm chhuah theihna tura budget hmasa bera SEDP crore 7500 lai mai a rawn dah nghal thei hi ropui ka ti tak zet a ni.

SEDP kalpui tum dan hrang hrang ah pawh hian kawngpui siamthatna tur te, Health Care lam te, sports tih hmasawna tur te leh education tih hmasawna tur te, skill development lama hmanna tur te a han dah a. Pu Deputy Speaker, ka hmalama sawitu te pawh khan SEDP-ah cheng 3,00,000 sem ringawt kan sawi rual hian Mizoram mipui zawng zawng hian kan chhawr theih tur a ni.

Kawngpui siamthat a ngaihzia kan hria a, thla 6 kalta kha chuan kal hleih theih loh khawpa kawng chhia, khaw thenkhatah phei chuan Sumo service hleihtheih loh va kan awm tawh te kha kan la hriain ka ring a. Amaerawhchu, Pathian leh mipuite zarah Pu Zoramthanga kaihhruai sorkar a rawn din hnu hi chuan kawngpuiah pawh hma kan sawn chho hle a ni. Chumi enkawl chhoh zelna tura SEDP mipui nawlpui in kan chhawr theih tura an dah te hi ropui ka ti tak zet a ni.

Tin, hriselna lam thuah thingtlang mipui ten an mamawh ngawih ngawih, an damlohna in enkawlna tur atan pawisa dah thei Chief Minister kan nei te hi a lawmawm hlein ka hria a ni.

Tin, ram hmasawna bulpui ber chu “Education” a ni tih hre thiam ran maia he sorkarin education a ngaipawimawh te hi ropui ka ti hle a ni.

Tin, Pu Deputy Speaker, PAHOSS te kan hmu a, hmannah Whatsapp group ah kan hmu a, MNF ministry hi chu a lo tha mang e aw, tumah hi inthliar lova an ti a. Kan vengah khuan hman atanga tun thlenga Congress ruh em em mai pawh hian PAHOSS atang hian a dawng a ni. Keiniah chuan a dik chu dik, a diklo chu diklo tia, a mamawh tak tak ten an dawna, kan ramin a hman tangkai theihna tura hetiang scheme ropui tak mai an siamte hi lawmawm ka ti em em a ni.

Tin, Annual Financial Statement kan han hmu a, phok 22-na ah khan chart mawi deuh deuh mai pahnih kan hmu a, Capital Expenditure tur leh Revenue Expenditure tur te kan hmu a. Helaiah hian sawi duh ka neih chu sorkar hnathawk te hlawh tur leh a behbawm te a kal hnem em em mai a, an hlawh ngawr ngawrah hian 39.6%, pension-ah 9.79 etc. Khang zawng zawngah khan kan budget 50% aia tam hi sorkar hnathawk hlawhah a kal a ni. Chulaia ka sawi duh chu Pu Deputy Speaker, vawiina sorkar hnathawk te hian 7th pay kan la tawh bawh a, kan hlawh phu tawkin he ram leh hnam tan hian an thawh tlan a ngai a ni. Mirethei leh harsa zawk mahnia indawm kang zo lo te kan chawi chhuah theihna tura thawktu kan ni a. Chutiang tak chuan rinawm tak leh fel tak, taima taka thawh a ngai a ni tih hi inhre tlang ila a tha in ka hria a ni.

Pu Deputy Speaker a tlangkawmna atana ka sawi duh chu kan budget pum pui han en hian a ropui ka ti khawp mai. Kum hmasa lam aiin hma kan sawn nasa hle niin a hriat a. Tihtakzeta ram tana hnathawh tum Chief Minister kan nei hi a lawmawm hle a ni. Ngaihtuahna fim tak hmangin ram rotling, nawmchenna tel lo ram hmasawmna tur leh mipui leh harsa zawk te khai chhuah theihna turin he budget hi a rawn buatsaih niin ka hria a, lawmawm hlein ka hria a, lawmthu ka sawi duh nghal bawh a ni e.

DEPUTY SPEAKER : Dr. K.Pachhunga i lo sawm ang u.

Dr. K.PACHHUNGA : Pu Deputy Speaker ka lawm e. Vawiinah Pathian malsawmna changin Mizoram hmasawmna tur budget sum hmuh tur leh hman dan tur ruahmanna budget tha tak mai, cheng vaibelchhe 16092.30 kan han nei hi a ropui ka ti khawp mai. Nichinah ka hmaah member zahawm tak tak te pawhin an sawi tawh a. He budget hi mipui budget dik tak a ni a, sorkar hnathawk lo leh mirethei zawk te budget a tih theih a ni. A budget hi kan han en vang vang hian a back-up pahnih lian deuh a awm a, chu chu kan hriat angin Revenue Expenditure kan tih, kan hman ral tur lam en hian, a sawisel tur tan chuan a va tam ve a tih theih a ni. Nimahsela hman ral tur a tam nachhan chu Finance Minister-in a present khan a sawifiah tawh a, sorkar hnathawkin 7th pay hlawh sang te an dawng a, Pensioner pawhin an dawng a.

Tin, election expense te pawh a ngai a, Zoram mipuiin kan buaipui em em mai Aizawl thleng pha ve chiahlo khaw hla deuh te, District demand-in Mizoram politics a nghawng a. Chung cheibawlina tur leh a taka ruahmanna turin sum dah a ngai a. Chuvang chuan hetia han ena 'a va tam' ve han tih kha ram leh hnam hmasawn nan hna kan thawh dawn tak tak avangin tam lo thei lo niin a lang a. Chutihlai chuan sorkar hnathawk kan ram ah 6% aia tlem kan awm a, a thawk lo hi tam zawk kan nih avangin heng sorkar hnathawk officer tam tak hian professional tax 2500 peon pawhin 2500 an pe a, Director pawhin 2500 an pe bawk a, hei hi chu kan hrut rual a, engpawhnise sorkar hnathawk hian kan budget tam ber kan ei a tih loh theih loh a, chuvang chuan sorkarin heti taka min duat si chuan Mizoram hmasawn nan sorkar hnathawk te hian kan hlawh 1% te hi chu han pe thei ila chuan kan ram hian hmasawwna ropui tak a thawk theiin in ka ring a. Sorkar hnathawk hian 1% te lo thawhlawm ve thei ila chuan vaibelchhe 50 te a lo tlingkhawm ang a, a aia tam pawh a ni ang a, chung chu mirethei zawk Health Care kan tih ang chi ah leh kalkawng leh ei leh bar intodelhnaah te pawh a rawn chhuah theih ka ring a.

Tin, kan ram hi kan hriat angin chawmhlawm min ti thin a, chuvang chuan a thawhchhuah lam hi sorkarin a tum tur ni pawhin ka ring a. He kan budget duhawm takah hian a chhung ah hian sum kan thawhchhuah pawh a ngai a, chutah chuan property leh building tax kan la a, ngun taka han en chuan duhthu a la sam lo deuhin a lang a. Mi hausa ten in an sa a, in luah man nuai 10 te thla khat ah an lo la a, mumal takin chhiah pek a awm vak lova, nimahsela mirethei maian tel leh mautuai zuar te chuan bazarah chhiah an pe lawi si a. Heng te hi kan sorkar budget chhungah hian en dan mumal deuha en theih a ni em tih te pawh hi rilru pu ta ila a that ka ring a. Chutih lai chuan kan ramah hnam dang mi kan building zawng zawng satu (mawi lo ni lo sela) vai mistiri an lo lut a, nichinah pawh report kan han dawng a, nikhatah ₹ 400 theuh pawh hlawh sela, chhiah an pek kan hre lem lova. ILP te hi pek loh theih loh ah a rate kan tisang dawn nge, man man zawka kan ram tana eng emaw an tih ve theih nan chhiah te pawh hi kan mithiam te hian han homework sela tih te kha ka rilru ah chuan a awm a. Chutih lai chuan capital expenditure ram hmasawwna tura ruhrel khawihna tur kha kan hmuh angin 22% ang vel kan allot a. Chu chu vaibelchhe 2,288 a a ni a. Heng sum hmanna tur kan Finance Minister in uluk taka a ruahman hi tha ka ti a. District pathum in relbawlina tur tih puitlin na te, mipui mamawh tur pek hi sorkar tha tih tur a nih avangin a ti

mek niin a lang a. Chutih lai chuan election laia kan tlangau pui Zoram kil tin mirethei te kaw, thingtlang thleng pha SEDP kan kalpui dawn a, vaibelchhe 750, a nuai zawngin nuai 70,050 lai mai kan han dah te hi a ropui ka tiin a lawmawm ka ti a. Chutah chuan kan hriat angin sorkar hnathawk lo kan tam em em a, mitin kan dam loh in kan harsa em em a, kan hria a, kan sorkar ngilnei takin medical reimbursement te leh damdawi ina thawk mi zawng zawng mamawh Doctor leh Nurse indaihlohna phuruk na tur a ruahman te hi a lawmawm a. Tin, kan dam loh in Health Care Scheme hnuai a awm te chu medical reimbursement tih theihin, thingtlanga awm mirethei leh hausa te pawh kan vaiin kan leng tih kha ka sawi tel duh a. Chutih lai chuan district tin ah Hospital kan nei a, mi zawng zawngin kan mamawh oxygen te pawh hi nei turin kan sorkar hian hma a lak ka beisei a. Kan hriat angin education hi a pawimawh tak zet a, eng ram tha pawh nei ila, Burma ram pawh a hausa a, India ram pawh a hausa sa a, mahse a enkawltu a chhunga cheng mihring te an quality loh chuan ram ropui a thleng thei lova. Mihring quality tha siam tur chuan kan sorkarin elementary education-ah sum tam tak te dahin, zirtirtu indaihlohna phuruk na tur te dahin, zirtirtu lak tumna te neiin sum dah a ni hi ropui ka ti a. Road and communication kan hriat angin kan ei leh bar kan lakna tur mi zawng zawngin kan mamawh, Congress pawhin an mamawh, ZNP pawhin an mamawh, MNF pawhin kan mamawh a, mirethei leh hausa pawhin kan mamawh kan CM in a ngai pawimawh a. Hma nasa tak a la tawh a, chungah te chuan sum thahnem tak a dah te hi a ropui ka ti a. Nichina member zahawm takin an sawi angin Mizoram politics a thil tha lo em em mai, sorkar hmasa in ram tana a ruahmanna tha te chhonzawm duh lohna a lian em em a. Chu chu kan sorkar, Pu Zoramthanga sorkar hian duh lo in pa ber nih tling tak leh ram neitu nih tling takin NEDP a hmalakna tha te chhonzawm nan sum nuai 11,000/- lai an dah te hi chhuanawm ka ti a. A ropui ka ti a, a chhan chu Mizo kan zavaia politics-a inhuatna kha tak tih reh na damdawi tha tak ni pawhin ka hria a ni. Chutihlai chuan ram development tha nia intodelha, ei leh bar hmu turin zirlai te leh thalai te tan skill development atan ruahmanna te a nei a, hengte hi hmuh hmai hauh loh a ni a. Chutihlai chuan sorkar-ah a hah ber leh kan chhawr ber ber te chu muster roll hlawh tlem te te te hi an ni a, ngaihsak loh an ni thin a, hlawhte an la tha hlei thei thin lo a. Mahse vawiina kan budget-ah hian muster roll tan nuai 8,500 lai mai kan han dahte hi a ropuiin a lawmawm ka ti a, vawiina kan sawi hi budget thianghlim tak a ni in ka hria a, mi zawng zawng a cover pawhin ka hria a. Tin, mirethei leh thingtlang lam

hawi pawhin ka hria. Engpawhnise Pu Dy.Speaker, budget hi a tam emaw, a tlem emaw a pawimawh ber chu a hman dik hi a ni tih chu ka thu tlang kawmna a ni e. Ka lawm e.

DEPUTY SPEAKER : Tunge kan sawm leh ang le? Pu Biakzaua i sawm ang u.

PU H. BIAKZAUA : Pu Dy.Speaker, ka lawm e. A indawtin sawi mai ila, sawitu an vang deuh hlek niin ka hria. Pu Deputy Speaker, i veilama thu te pawh hian an sawi chak vak lo nge ni a tha an ti tlangpui tih ngaihtuahnaah a awm deuh hlek a, zinglama an sawiah khan a tlangpui thuin Pu Deputy Speaker, an comment deuh vek a, comment lo pakhat a awm a ni deuh mai a, chuvangin vawiina budget general discussion kan neih hi a lawmawm ka ti a, kan lungrual tlang viau pawhin ka hre nghe nghe a ni.

Pu Deputy Speaker, kum 2019- 2020 budget estimates sawi thei tura hun tha tak ka nei hi ka lawm hle a, budget tha leh tha lo tehna pawimawh ber nia ka ngaih chu mipui hamthatna budget-ah chuan a awm em tih hi a ni a. India ram ah hian lo siamtu te, sumdawng te, eizawna kawng hrang hranga eizawngte hian, Union budget te an ngaihthla ngun em em thin a, an hnathawhna an sumdawna an awmna hmun apiangah TV te, Radio te hmangin Union budget hi an ngaihthla tang tang thin a ni an ti a. Lo siamtu te pawhin an lo ah te radio te ngaihthlain lo siamtute tan hamthatna a awm em tiin an ngaihtuah nasa hle thin an ti a ni.

Chutiang chuan tunah pawh hian Mizoram budget kan Chief Minister zahawm tak Finance changtu in a rawn pharh tak hi hmun tam tak atangin kan ram hmasawna tur a awm leh awm loh thlir leh ngaihtuahin thil chinchang ngaihtuah mite chuan tunah pawh hian min ngaihthlak reng ka ring nghe nghe a. Chief Minister zahawm takin budget a pharh hi a tha hlein a lang a. Zir chian chuan mipui lam hawi budget dik tak ni pawhin ka hre nghe nghe a, lawmawm ka ti khawp mai.

Kum 2018 – 2019 Revised Estimates atanga chhutin tax revenue-ah 13.52 % in a pung dawn hi a lawmawm hlein ka hria a, tax lakna tur zu te, lifetime vehicles tax kan han tih ang chi te tihtawp a nih tawh hnu pawha, kan state atanga revenue kan hmuh tur a han pung chho thei tur te pawh hi kan Finance Minister, Chief Minister ni bawk remhriatna leh finance management a thiamna a lang hlein ka hria

a, lawmawm ka ti a, ropui ka ti tak zet a ni. Tin heng zingah hian kan sawi tak angin vaibelchhe 1032.99 hi kan thawhchhuah tur a ni a, kan state thawhchhuah tur bik hi a percent-a kan lak chuan 10.49 chauh a ni a a tlem ang reng hle mai a. Chuvangin tax lak leh pek chungchangah hian vawiina ka han sawi hmasak duh chu mipui kan tan a ngai hlein ka hria a ni. Tax kan pek that chuan hna tam tak kan inchhung atang pawhin kan thawk thei a ni tih a lang chiang em em a. Chuvangin tunah pawh hian mipuiahsarsalo thei ang ber turin ngaihtuahna kan Chief Minister zahawm takin a nei a, kan tax collect tur/hmuh chhuah tur lam hi chu a lo pung chho thei tho dawn niin kan BE atang hian a lang thei hi lawmawm ka ti tak zet a.

Tin, revenue receipt hi revenue expenditure aini 5.58% in GSDP atanga chhuta a tam thei hi a lawmawm ka ti a. Hetianga budget han duan thiam viau hi financial management thiamlo tan chuan thil harsa tak tur pawh niin a lang nghe nghe a. Tuna a lan dan hi chuan kan budget hi a duhawm hliah hliah a, mipui lam hawi ngei a ni tih hi a lang chiang hle in ka hria a ni.

Tin, thil pawimawh tak kan budget-a lang nia ka hriat chu state matching share (SMS) kan tih ang chia vaibelchhe 170 dah a ni hi a tha hle dawn in ka hria a. Centrally Sponsored Scheme hrang hrang, ministry hrang hrang atanga kan hmuh theih tur, matching share a san avanga kan ngam loh thil ang chi kha kumin kal chho turah hian tam tak kan pawh luh phah thei dawn niin a lang a. Heng CSS kan han tih ang chi te, NABARD atang te, NLCPR atang te, NEC atang te leh ministry hrang hrang atang tea he crore 170 hian eng zat nge a leichhuah ang a, eng zat nge a thleng ang aw ka ti a. Chutianga ngaihtuah chuan he vaibelchhe 170 hi nasa takin a pung ang a, kan state-ah hian nasa takin hna a thawk thei ang tih ka ring tlat a, a lawmawm ka ti khawp mai.

Tin, he sorkarin sum a hmanna tur tlangpui a tarlan te en hian budget tha tak ni thei dawnin a lang a. Mipui, thingtlanga awm te leh miharsa zawk te tana tangkai tur SEDP kan han tiha vaibelchhe 750 dah a han ni te hi ei leh bar zawna tur kawnga thingtlang amite leh kuthnathawka eizawngtu te'n an tangkai em em tur, kan ram hmasawna tur leh kan inkhaikanna tur point pawimawh tak niin a lang a ni.

Tin, Health & Family Welfare Department lama hnathawktu indaihlo lutuk, thingtlang ah Health Worker te, Nurse te, Doctor te pawh hmun hrang hrangah indaihlovin kan awm mek a, chutiang lam ngaihvenna leh ngaih pawimawhna hna ruak hnawhkhahna tur engemaw zat dah a ni te.

Tin, zirna lamah tunah kan tlahniam han ti ila, zirtirtu indaihlohna te a nasa em em a. Tin, building leh thil hrang hrangah tlakbalna lai Education-ah kan ngah em em a. Chungte han puhru tur leh han tuamhlawm tur chuan sum engemawzat dah a han ni te.

Tin, kawngchhia siamthatna tur engemawzah dah a han ni leh bawk a. Kalkawng hi Mizoram chhim, hmar, chhak leh thlang ah kan ngaih pawimawh leh mipuiin kan hman tlan leh kan hman rim ber a ni theuh mai a. Chuvang chuan kalkawng siamna turah sum leh pai engemawzat dah a han ni te hi a lawmawm takzet a ni. Tin, hmanni lawkah PAHOSS launching programme – te pawh hman a ni a. Parking chungchangah Aizawl-ah hian a bik takin harsatna a nasa em em a, hmun tam taka hmanhmawh deuha kal ngai, kal thei lo chutiang traffic problem avanga harsatna kan tawh zawng zawngte pumpelh theihna tur ang chi ruahmanna a han awm te hi a lawmawm tak zet in ka hria a ni.

Tin, thalai te infiamna lama hma an sawnna tur leh (Dy. Speaker : Minute 1 kan la nei aw.) an hmasawn theihna tur Sports & Youth lam te pawh ngaih pawimawh a han ni chho a.

Tin, district 3 hawn belh a ni hian district inrelbawlina department hrang hrangah restructuring a ngai ngei dawnin a lang a. Hei hi ka han sawi duh lai chu Pu Deputy Speaker, district thenkhat chu Electric - E.E 3-in district 1 kha an vilrawn a. Tin, chu bakah P.H.E - E.E 2-in district 1 an vil a, PWD – E.E 2-in district 1 an vil bawk a, DCSO - Supply lamah 3-in an vil bawk a. Chutiang chu Lawngtlai District saw tunah hian a ni mek a, district dang te pawh an invil pawlh nuaih mai a. Chuvangin tun tuma kan Chief Minister zahawm takin district 3 hawn belh tur a han siam atang hian department tam tak hi restructuring ngaiin anmahni jurisdiction theuh te pawh kha an inawp thei turah ka ngai a, beiseina thui tak helai pawh hian min neih tir a ni. Chutiang a nih avang chuan Pu Deputy Speaker, he kan budget

hian Mizoram pum tuam tur leh siamtha tur hian nasa takin hna a thawk thei ngei dawnin ka hria a, lawmawm ka ti hle a ni. Ka lawm e.

DEPUTY SPEAKER : Hun kan hmang thiam hle mai a. Tunge kan han sawm leh ang le? Ram mipuiin min thlir thup a, theihpatawpa kan sawi kha kan mawhphurhna a ni tih kan hriat a, theipatawpa kan chhuah kha a pawimawh a ni.

Pu H. Lalzirliana ilo sawm ang u.

Er. H. LALZIRLIANA : Pu Deputy Speaker, ka lawm e. Vawiinah hian budget 2019-2020, Mizoram budget sawi theia ka awm hi ka lawm khawp mai a. Thian ten an sawi nual tawh a, he budget vawiina kan pharh hi a sawihona ringawtah pawh a hlawk thlak tawh hlein ka hria a. He budget hi mipui te thleng phak, thingtlang mi bial chekhnawk tan phei chuan a lawmawm zualin ka hria a.

Ka lawmna zual point 4/5 lek han sawi ve ka duh a ni. Kan hriat angin tunah Niti Aayog hnuaiah kan budget system te tihdanglamin a awm a. Tunhmaa plan leh non-plan tih ang kha awm tawh loin state budget leh Union budget kan nei a, vawiina kan present hi state budget a ni. Hei aia lian daih zawk hi, a khurpui leh a tuizempui Union budget kan nei a ni tih kha member te hian hre tel ila a thain ka hria.

Chumi kan Union budget thal chhuak tur chuan kan Minister-te leh department hrang hrang chelhtute hi an fit tawh tih pawh hi he budget rawn siamtu kan Finance Minister, kan Chief Minister ni bawh hian a hria ni hian a hriat a. Chumi state matching share lo do let vena tur pawh 17 thousand lakhs neih sa kan nei bawh a ni. Chumai piah lamah kan pawisa neih sa te leh head dang ami pawh a tul a nih chuan he state matching share atan hian hman nachang kan hria ang tih hi a rinawm em em a ni. Chutiang chuan tunah hian kan hmuhchhuahna lam tur tax kan han collect ve tura kha a pawimawh khawp mai a, Tunah chuan tax system pawh a dang vek tawh a, VAT kan tih te leh tax hrang hrang kan neih kha awm tawh loin CGST a awm a, state GST a awm a, hetah pawh hian kan han beiseinaah Central GST-ah ₹ 3,385.19 crores atang hian state-in kan hmuh ve tura kan beisei ₹ 1,075.85 crores kan nei a ni.

Hemi GST kan sawi mek laia ka han sawi tel duh chu he kan budget-ah hian petroleum & petroleum product tih hi ka hmuh hauh lo mai a, hei hi state in tax kan hmuhna tur pawimawh tak niin ka hria a. Tunah hian petrol leh diesel hi GST product a la ni lova, lubricants chauh hi GST product hnuiaia la dah a ni a. Tunah hian Mizoram leh Assam hemi kan tax rate difference hi petrol bikah 32.66 % a ni a, Mizoramah hian 20 % chiah kan la a ni. Diesel bikah hian Assam-ah 23.66 % an la a, Mizoramah hian 12% chiah kan la a ni.

Petrol leh diesel price difference hi Vairengte leh Assam border ah khuan a danglam nasat em avangin Mizoram-a supply petrol leh diesel lo kal tur tam tak hian harsatna a neih phah a. Dealers te leh transporter ten Assam ram chhunga an hralh tura an lak kha Mizoram chhungah tam tak an rawn phur lut a ni. Tin, chu mai piah lamah chuan a control system adulteration thlengin hei hian effect a nei a ni tih hi kan hriat a pawimawh a. Hemi tax difference sang lutuk hi a inang chiah te chuan ti ila mipui ten kan zo lo deuh te pawh a ni maithei a. Amaherawhchu he tax difference hi hnuh hniam a ngai a ni. Chu chuan Mizoram budget-ah Mizoram sorkar tan revenue tam tak a phur chhuak dawn niin ka hria a. Chu chu ngaih pawimawh atan kan hotuten min lo neih sak sela.

Kan budget-ah hian kan sawi tawh ang khan lawmna zual ka neih thenkhat te, district thar hawn tur hian kan sawi ang khan revenue, capital expenditure pawh a nei ang. Amaherawhchu revenue pawh hi an earn ang a, kan sawi fo thin thuneihna sem zai tih kawngah te leh manpower, sorkar hnathawk mipui te hamthatna turah hian nasa takin hei hian kawngro a su dawn a. Chuvang chuan a affected, district tan phei hi chuan lawmna tur a ni, he budget-a sum heta hman tur rawn tel hian a awm dawn a ni tih a tichiang a, chutah chuan sum leh pai pawh hman tur a awm sa hi a lawmawm khawp mai. Tin, SEDP kan project flagship project-ah hian mirethei leh hnuaihngung zawk te, thingthlang miten Tlumtea thlira an lo thlir, 'engtikah nge ni ang, engtik ah nge khai chhuah kan nih ve ang, engtik ah nge budget ah hian pharh a nih ang,' ti a an lo thlir kha vawiinah hian hei ₹ 7,500 lakhs dah a ni hi a lawmawm khawp mai tih ka sawi tel duh a.

Tin, roads siam that nan nuai 15,000 an awm te, kan Health Care Scheme ber hi a pawimawh ka ti a. He kan Health Care Scheme kalpui tum dan hi a ropuiin a lawmawm ka ti a. Heti a nih chuan chungtin kan buai em em na, sorkar hnathawh

ve hram kan duhna pawh hi a nihna takah chuan kan Health Care System mumal loh vang a ni. Hei hi a mumal phawt chuan mi zawng zawng hian sorkar hnathawh hi kan tum kher ka ringlo. ₹ 5,000 lakhs nurse leh doctor te leh paramedicals kan tih ho tana hman tura ruahman a ni a, medical reimbursement atan ₹ 2,000/- lakhs, corpus fund atan ₹ 5,000/- lakhs, tichuan a vai hian ₹ 12,000/- lakhs vel dah a ni a, a lawmawm khawp mai. Tin, education kan ngaipawimawh a, zirtirtu indaihlohna a nasa em em a world class education kan buaipui si a, hei hi a kawng awm a ni a. He sorkarin education a ngaipawimawh a, chutianga budget kan Finance Minister-in a rawn pharh hi a lawmawm hle a. Amaherawhchu pakhat, sports bik hi duh aain a tlem deuh a, amaherawhchu, vawikhata tih vek a har tih chu kan hre vek a. Kan sawi engah khan in ni ve thoin ka ring a, bial han fang ila bial mipui ten an lo dil chu sports thil hi a ni a, football te, net te an lo dl a, theih ang tawkin an mamawh puhruk a lo ngai ve si thin a ni. Amaherawhchu, kha kawng ka kawhhmuh tawh che u a, petroleum product-ah khan tax te han tisang hret ila, chungte chu sports chawikan nan han hmang tangkai ta ila chuan mi zawng zawng tan, mipui tan leh a bial neitute tan pawh kan hman tangkai theih tur a nih kan ring a ni. Chungte chu ka rawn sawi ve a ni e. Ka lawm e.

DEPUTY SPEAKER : I hun i hmang dik chiah chiah a ni. Tunge sawi leh ang le? Pu Lalmuanpuia i lo sawm ang u.

Pu C.LALMUANPUIA : Pu Deputy Speaker, wawinah hian kum 2019-2020 budget sawi thei tura hun tha min petu leh min siamtu Pathian leh Aizawl North III bial mipuite chungah a hmasain lawmthu ka sawi duh a.

Kumin 2019-2020 budget tha tak mai pharh ani hi a hmasain lawmthu ka sawi a. A vaiin vaibelchhe 10,692.30 a ni a, a lawmawm hlein ka hria. Hetiang zat budget hman tur pharh a ni thei hi kan House Leader zahawm tak leh kan CM/Finance Minister ni bawh chungah lawmthu ka sawi hmasa duh bawh a ni.

Kan budget han en hian hmasawna hna thawhna tur Capital Expenditure a tam tha tawh hlein ka hria a, vaibelchhe 2,288.78 lai mai kan nei a. Budget pumpui atanga thlirin 21.40% lai mai a han awm thei te hi a lawmawm ka ti tak zet zet a. Tin, sorkar hnathawh hlawh leh pension hlawh leh sorkar inrelbawlna atana sum kan dah te pawh hi a thahnem tham hle mai a. 7th Pay te a lo ni a, sum mamawhna a lo sang zel a, vaibelchhe 8,403.52 kan han dah thei te hi a lawmawm ka ti tak zet zet a

ni. State owned revenue leh state own non-tax resources nikum aia cheng vaibelchhe 225.8 lai maia a han pung thei mai te hi a mak ka ti a. Engtin nge hetiang a nih theih mai le tih te ka rilruah a rawn lang a. A lehlamah kan tax lakna hmanrua, kan hriat tawh ang khan member zahawm tak tak ten he House a an sawi tawh ang khan khangte kha kan han ti tawp a ni a. Amaherawhchu kan Finance Minister, kan House Leader zahawm tak hi finance lamah experience a lo nei tha hle mai tih a lang chiangin ka hria a, a lawmawm tak zet zet a ni.

Kan budget kan han thlir a, district thar 3 function na tura sum kan dah te kan hmu a, cheng nuai 450 dah hran an ni te leh district 1 theuhah cheng nuai 150 zel dah an ni tih te kan hmu a, a lawmawm ka ti tak zet zet a. Tin, district 3 ah SP Office dinna tur cheng nuai 65 theuh dah a ni te, a vaiin cheng nuai 195 ruahmanna thar a han awm te hi a lawmawm tak zet zet a ni. Tin, kan sorkar flagship programme pawimawh tak mai Socio-Economic Development Policy (SEDP)-ah a kalpui chhoh nan cheng nuai 75,000 lai mai dah a ni te hian kan sorkar hian hawi lam neiin, tum lam neiin, tih tak takin mirethei lam a hawi dawn niin a lang a, a lawmawm tak zet zet a ni. SEDP buaipui tur hian tunah hian Board 14 lai a inher rem chho mek a ni a. Heta sum awm buaipui tur leh rualkhai zawka hmasawna kalpui a nih theih hi ka beisei tlat a ni.

Tin, doctor leh nurse post ruak eng emaw zat awm hnawhkhah nana cheng nuai 5,000 lai dah a ni te hi a lawmawm tak zet zet a. Chumai pawh a la ni lo va, zirna lamah pawh elementary zirna tha zawk a kal theihna tura a indaihlohna phuhruk nan cheng nuai 3,000 dah hran a ni te hi a lawmawm hlein ka hria. Kan ram chung kan hria a, kan kawngpui, chhim leh hmar, chhak leh thlang kan en a, tunah hian thum that mek a ni a. Chung thum thatna tur atan pawh cheng nuai 1,500 dah hran a ni te hian thla a ti muang tak zet zet a. Tin, kan ramah hian mi harsa zawk te dinhmun chawikan nan te, mi harsa zawk te hriselna te a lo that theih nan HealthCare Scheme zawmtute medical re-imburement chin fel zung zung a nih theihna turin nuai 2,000 Assistance to Health Care atan dah a ni te pawh hi Pu Dy. Speaker, he sorkar hian theihtawpin mi harsa zawk, mi hnuaihning zawk ten an hriselna an vawnhim theihna turin ke a pen mek a ni tih hi a takin a lo lang a, a lawmawm tak zet zet a ni.

Chu mai a la ni lo a, sorkar hmasain NEDP, SPP leh thil dang kaltlanga project a lo tan tawh te chu hluihlawn mai lova chhonzawm zelna tura sum tam tak mai cheng nuai 11,000 ruahmanna an siam te hi a hluin ropui ka ti a. Sorkar hmasain thil tha a lo tih te a chhonzawm zel a ni tih hi a tak takin hmuh theihin a awm a, a lawmawm tak zet zet a ni.

Py Dy. Speaker, PWD road fund atan pawh ruahmanna tam tak mai SEDP hnuaiah cheng nuai 15,000 dah tawh bakah nuai 5,000 dah hran tum a la ni leh zel te pawh hi a lawmawm ka ti a. Tin, Aizawl khawpui kan hria a, kan chep tan tawh em em a, kan buaipui tlang theuh a ni tawh a. Lirthei phei chu intlan chhawk dan ngaihtuahin tunah hian a tha ber, a enge tha ber ang tih zawn a ni a. Tin, a tha ber tur pawh tunah hian ngaihtuah chhuah thiam har khawpin kan buai tan mek a ni a. Kan motor, kan lirthei pun dan te kan thlir chuan kan hria ang a, nitin Transport Office-a motor in register thar te kan en chuan, a pun dan rate han en chuan kan kawng leh kan parking hmun te a pung ve rih si lo a. Chuta tan chuan kan CM zahawm tak, kan House Leader-in a lo sawi fo tawh thin angin, mi te tih ngai pawha hriat loh thil thar duhawm tak mai Parking House Support System (PAHOSS) kalpui mek tihhlawhtlin nan nuai 6,000 lai dah a ni te hian kan ram khawpui ber he Aizawl, kan Jerusalem chinfel tumna kawngah ruahmanna thar mitinin kan chhawr theih tur a thlawn liau liaua he sum hman dan tur ruahmanna a han awm te, parking house siam duh ten hmun remchang leh an in leh lo ten a zir phawt chuan a thlawn liau liaua mipuite tan ruahmanna he sorkar-in nuai 6,000 lai siam a tuna a bul tan nan a kalpui mek te hi Pu Dy. Speaker, a tha thlawtin ka hria a, a lawmawm ka ti a.

He budget hi a belhchian tlak hlein ka hria a. Ram dang hmun dang atanga lo kal te pawh hian kan khawpui chhung, kan ram, kan motor lirthei che vel an han hmuh pawh hian an sawi thin chu kan khawpui hi a reh duk mai a, horn hmeh lohna khawpui a ni a, heng te pawh hi ka sawi kai talh duh a, Pu Dy. Speaker, chhonzawm zel a va tha em! Intibuai lo in kan motor, lirthei kal vel te pawh hi tunhnai lawkah hian he problem hi solve a nih theih mai te pawh a beiseiawm a.

Tun atanga kum 10-ah chuan hetiangka kan kal zel chuan kan kawng sir motor park hnawh tak tak te pawh hi inthliarfel in he PAHOSS-ah hian felfai zawkin a indah luh vek theih ka beisei a, a lawmawm ka ti tak zet bawh a ni.

Tin, Pu Dy. Speaker, ka sawi leh duh chu Lokayukta-ah vaibelchhe 3.71 lai mai dah a ni hian eirukna leh kawng hrang hranga helam thubuai chhuitu tur, helam kawngah hian kan sorkar hian tih tak tak in hma a la tih hi chiang takin a lang in ka hria a, a lawmawm ka ti tak zet zet a. A tak taka hetiang a ke kan han pen te hi Pu Dy. Speaker, a chhuanawm tak zet zet in ka hria a ni.

Tin, power indaihlohna a nasa em em thin a, mihringte mamawh chu tui leh power, a pawimawh em a, kawngpui tha te kan han aupui thin a ni a. Tui emergency bill supplementary demand-a siamrem ngai thin (Dy. SPEAKER : I hun a tawp e) Pu Dy. Speaker, kan sawi zo lawk ang e helai te chu. Cheng nuai 3,000 lai dah a ni te hi a van lawmawm em! Tin, kawlpheha neihna tura bill chinfel nan nuai 3,000 dah hran a ni te hi a lawmawm ka ti tak zet zet a. He 2019-2020 budget hi Pu Dy. Speaker, a thlamuan thlak hlein ka hria. Ka lawm e.

DEPUTY SPEAKER : Hun kan hmang thiam thin hle mai. Tunge kan sawm leh ang? Pu C. Ngunlianchunga i sawm ang u.

PU C. NGUNLIANCHUNGA : Pu Deputy Speaker, ka lawm e. Kei hi ka aw a chak vak lo a, churang chuan tui ka in zeuh chang pawhin min hrethiam dawn nia. Kan Group Leader khan minute 5 min spare a, kha kha keiin ka'n ring ve ang a. Kan budget 2020 sorkar tharin a rawn pharh a, member te'n an fak liam liam a, a fakawmna chin pawh a awmin ka hria a, a fiah tha ang reng a. Chutihruah chuan kei chuan sawisel tur a tam in ka hria. A chhan chu budget kan han keu a, kan budget figure ₹10692.30 atang khan bel a'n ni nghal pawp mai a, in budget speech chauh kha keu ula, bel chawp a ni, original a ni lo a ni.

Tichuan, kan en zel a, thenkhatah hian kum 2020 a awm laiin thenkhatah 18, 19 leh 20 tih ringawt khan helaia a inziah dan hi ka hriatthiam loh vang nge. He budget speech bu khatah hian 2020 tih leh 2019-20 tih chauh ziaik te a awm a, bu khat inziaik theuh theuh si ah hian Pu Deputy Speaker, kan budget hi a chianglo khawpin ka hria. Tichuan, kan sorkar hi kan inen fimkhur a pawimawh khawpin ka hria, bul kan tan dawn chauh a nia. Kan full budget kan Finance Minister zahawm takin bel chawp a rawn pharh a. Tichuan, Choice of the People published by Information & Public Relation Department, Govt. of Mizoram hian bel chawp Choice of the People a rawn dah bawk a ni. Hon. member, MLA Pu K.T. Rokhaw, member zahawm tak hi Tuipang bial, bial tawp ber a nih avanga dah hniam bik a ni

nge, a chhung ka han keu chuan Pu Rosik Mohan, vawiina CADC, CEM kha original-ah a awm a ni. Pu Deputy Speaker, hei hi i hmuh atan kan pawt thla ang a, (Pu Deputy Speaker, kha kha sorkar in a publish em ni?) Ni e, published by Information & Public Relation Department, Govt. of Mizoram a ni e. Hei hi Information atanga kan dawn a ni. Vawkte mawng pawp sem lai kha chu eng pawh ni se document-ah a awm a, vawiin ah hian ka rawn show a ni hei hi member te... (Dy. SPEAKER : Kha kha i rawn lekchhuak si a, House property-ah i rawn dah dawn nge?) A tha khawp ang chu Pu Deputy Speaker. Amah aia hmel tha daih an bel leh nghal a.

Tichuan, ni 15.4.2019 ah hian Shri C. Ngunlianchunga MLA, Mizoram Supply of Statistical Hand Book, Mizoram 2018 tih min rawn pe ve leh a. Chutah chuan Dr. K. Beichhua hi Excise & Narcotic Minister a ni a, he statistical hand book-ah hian Excise & Narcotic Department hi a awmlo reng reng. Pu Deputy Speaker, kan sorkar thar hi kan fimkhura kan inuluk a ngai khawpin ka hria. First budget speech atangin 'bel chawp' in bul kan han tan hi kan inenchian a ngaiin ka hria. Mathaia 24 ah chuan, "Lehkha ziaktute leh Pharisaite u, thlanlung hnawih var ang in ni. A chhungah erawh chuan ruhro leh thil bawlhawh hlir a awm si a" tih kha kan ang palh ang tih a hlauhawmin ka hria a.

Vawiinah budget discussion kan nei a, general discussion a ni a, official lam an tlem khawp mai a, kan Chief Minister, Fin. Minister tihsual chu a ni hauhlo ang a, a buatsaihtute chu official an ni. Chuvang chuan kan official-te an fimkhur a ngaiin ka hria a, thuhmaah chu chu ka han sawi duh a ni.

Budget kan han sawi a, kan lawm tlang viau a, a lawmawm pawhin ka ring a. Keini lam atang erawh chuan han lawmna tur erawh hi chu a awm meuh em ni aw, ka ti a. Pakhatnaah chuan, MLA angin MLA fund cheng nuai 100 nei thin nuai 150 ah a han chho a, hei erawh hi chu a lawmawm ve khawpin ka hria, keini i veilama thute tan hian. Chu bak chu han lawmna tur teh vak a awm em maw ni le ka ti a ni. Kan budget kan hria a, cheng nuai 10,692.3 (singkhat leh zaruk leh sawmkua pahnih leh sing thum) atangin thawktute, fatu hlui lamah chuan cheng nuai 8,403 leh nuai 52 a ni a, mipui lam chanah chuan cheng nuai 22,280 leh 78,000 a ni a. A percent a chhut chuan a thawktu lamah chuan 78.59% a kal a, mipui lamah 21.41% chauh a ni. Hei hi budget tha tak a ni thei dawn em ni? Sorkarin budget a siamin a ram

mipute chan a voh tur a nih lain vawiinah chuan a ram mipuite, ro kan rel saka te leh rawng kan bawl saka te chavo tur erawh chu 21% chauh a nih hi. Budget thalo tak ram mipuite tan chuan niin kei chuan ka hria.

Chutiang chuan kan han lawm viau a, kan han fak viau lai hian sa talh thin ho hian an ti a, bawngte, sialte han talh hian a ei tlak hi 71% te an ti a, ar te pheh chu 50% vel chuah hi a ei tlak a, a bak hi chu paih tur vek an ti a. Vawiina kan budget-ah hian a ram mipui ei tur chu a chaurau khawp mai a, chu chu kan dinhmun dik tak niin a lang a.

Tin, helaiah hian SEDP te kan ti a, kan la sawi zel ang a, a speech-ah hian kan hmu a, a te sep sep kal a tam hle a ni. Nichinah khan Pu Deputy Speaker, sorkar thar a lo pian khan kan House Leader in a sawi chu, “Zu zawrh kan ban ang a, ruihhlo ngaite enkawlina kan ngaipawimawh ang” a ti a. Tichuan zu zawrh chu kan han ti tawp a, Dr. K. Beichhua, Minister fel takin mawhphurhna a han la a, a ani pawhin a lo hrechiang biklo te pawh a ni ang a, duh chen chen dry area-a puan te an han tum a, High Court-in a han stay a, (DY. SPEAKER: Minute 1 i la nei e.) Chuti chauh chu maw? Pu Deputy Speaker, khawngaih takin, nang pawh he lama i thut laiin thahnem i ngaih viau kha. General Discussion a ni a, tin, kan leader khan minute 5 a kalsan a, ‘kha kha i ring thei ang’ Speaker khan a ti a.

Tichuan Pu Deputy Speaker, ka ngaih pawimawh em em chu District Council and Minority Affairs-ah hian 2018-19-ah khan salary atan hian cheng nuaih 11,552.05 a ni a, tichuan kumin 2019 leh 2020-ah hian cheng nuai 14,971/30000 a ni a, he kan demand zawng zawng ah hian 7th pay avangin 2018-19 aiin Salary Head-ah a pung vek a ni. Eng vanga District Council te Lai ah hian nuai 580/75,000 in salary head-ah a tlem a, tichuan non-salary head-ah hian nuai 49 leh 4,000-in demand no 27-naah khan a pung ve thung a. Tin, LADC-ah hian 2018-19 kuminah hian cheng nuai 107-in salary head-ah hian a tlem a; tin, non salary-ah hian cheng nuai 47.42-in a pung ve thung a. CADC-ah hian 2018-19 aiin salary head-ah hian nuai 361.01-in a tlem a; tin, non-salary-ah hian cheng nuai 23-in a pung ve thung a ni.

Pu Deputy Speaker, mi hnathawktu hlawh chu bata ruat a ni, salary chu salary a ni a. Hei hi Pu Deputy Speaker, khawngaih takin a pawimawh em a, ram issue tak tak pawh a ni a, 6th pay anga hlawh hi siam sak niin a lang a, he 7th pay

hman dawn lai khan Pathian leh hotute duhsakna avangin Minister angin cabinet-ah kan tel ve a, July ah 7th pay kha hmang tura tih a ni a, khatih lai khan District Council te leh PSU te an tel loh avangin ngaihtuah that niin September atanga kan zavaia Mizoram sorkar hnuaia thawk zawng zawng, grant-in-aid system te nen pawh a daih theihna tur atan tih kha 7th pay kha hman tir an ni a. 2018-2019 khan Lai Autonomous District Council-ah te, Chakma-ah te, Mara-ah te 7th Pay hman an ni. He kum khat lo kal turah hian District Council te hi he kan sorkar hian 7th pay kha a hman tir ve dawn lo em ni? Enge ni tihsual palh tih lai kha khawngaih takin hei DCA Minister a awm lova, khawngaih takin min lo enchian sak se tih ka duh khawp mai a.

Tin, SEDP chungchangte pawh Pu Deputy Speaker, sawi tur a tam khawp mai a, kan han ti a, kan Chief Minister zahawm takin, tuihna, tuidawn lian tak lo kal a, tuikhur danga luang chhuak hum hum, cheng nuai 3 chhungkaw tinin in dawng ang tia beisei em em, amah ngei pawhin vawiinah a sawi a. Vawk an talh a, a ril pawh pawrh hmian mipuiten kan dawh huai huai tawh lai a, engzat teh vak mah cheng nuai 75,000 atanga cheng nuai 30,000 vel kha normal fund atana hman tur awm chauh, chu pawh chu a danga la pawhpen leh turte ruahman a ni kha kan ram mipuite kan kaihhruai tumnaah hian, he ram leh he sorkar hian ram mipuite kawng dik leh thudik zirtir ila, kawhhmuh ila a tha khawpin ka hria.

Vawiinah kan budget a lo lang ta a, kan sorkar chuan chhungtin hnenah cheng nuai 3 kan pe ang an ti a. Helai a pek dan tur pawh hi ka ngaihtuah thin a, kan bial sawtah Bangladesh border te, Burma border-ah te khian eng project nge kan siam ang, Mau lo ti se a mau man aiin a phurhna man a to ang a, ran vulh se chuti bawk, helai tak hi a manganthlak hlein ka hria a. Pu Deputy Speaker, sawi tur a tam hle si a, minute 15 kan ti a, minute 10 ka hmang chiah em maw ni le?

Pu Deputy Speaker, eng pawh ni se, khawngaih takin, DC thar te kan han lawm em em a, tuna DC kan neih lai ten nuai 1000 chuang kumtin an inenkawlina turah keinin nuai 500 kan pe a, building sak a ngai ang a, building pakhat sak nan pawh tunlai chuan nuai 500/ 600/700 te a lo ni, ramri ni se vawiin thlengin chinfel pawh a la awm si lo, hei hi lawm em emna tur a awm em ni? Kan sorkarin vawiina budget kan pharh takah hian ram mipuite chan a awm lo hi a vanduai thlak ka ti a ni. Pu Deputy Speaker, hun min pek belh a ka lawm e.

DEPUTY SPEAKER : Member zahawm tak Pu Ngunlianchnunga hi damlohna a neih avangin tui a in zeuh zeuh te pawh kha kan hriatthiam a tul a ni tih kha ka'n sawi duh a. A lo tuipei deuh ber a niang e ka'n ti deuh a ni.

Pu Lalrintluanga Sailo i lo sawm ang u.

Pu LALRINTLUANGA SAILO : Pu Deputy Speaker, ka lawm e. Kum 2019-2020 full budget vawiina discussion-ah thusawi theihna hun min pek avangin lawmawm ka ti a. Ka hmaa thusawitu kha tawngkam a thiam khawp mai a, lawmna tur a awm loh thu a sawi a, lawmna pakhat a neih kha kan House Leader leh kan Speaker zahawm tak ho tena an relna anga MLA fund nuai 50 a lo pung kha a ni mai a. A sem thang tawh si a, a sem lo lamah a tang si a, lawmna kha a neilo niin ka hre deuh a, helamah hian lawmna nei tur chuan Pu Deputy Speaker, lo thu pheii mai se ka ti deuh a.

Tin, chhim lam kha a vei khawp mai a, sawlama harsatna hrang hrang kha, an hun lai khan an lo chingfel lo nge ni a, an vawkte semna zozai te khan lo ti deuh se chuan a tha tur a nia, a mawngping lo deuh hlek te kha lo ti se sawlam pawh an lo in develop turah ka ngai deuh a ni.

Pu Deputy Speaker, vawiinah hian a lawmawm hlein ka hria a, kan hotu hmasa ten min zirtir angin, mirethei te lam hawi budget niin ka hria a, vawiina kan budget han sawi tur hi, a lehlamah chuan party angin hun kan hmang a, kawng hrang hrangin, chulaiah chuan engpawh ni sela, party ten policy kan nei a, chu kan policy chhungah chuan kan hmaa sorkar kalta khan NLUP kha an flagship programme a ni a. An flagship programme-ah khan kan sorkar veleh 'Intinah cheng nuaikhat kan sem ang' kha an ti a. Amaherawhchu, 2008-a inthlang kha 2009 budget-ah an rawn tilang lova, 2010-ah khan an la tilang lo fova. 2011 ah khan cheng nuai 23,000 kha an rawn dah ve ta kha a ni a. Vawiinah kan Finance Minister, kan House Leader zahawm tak ni bawkin a vawikhatna atan kan budget-ah SEDP, kan flagship programme atan cheng nuai 75,000 a dah hi a tam hlein ka hria, a bultan nan chuan. Tin, sorkar hmasate nena han buk pheii chuan a ngaihna awm ngang lovin ka hre deuhhlekk a ni. Chutihruual chuan kuthnathawktu ten an thawhchhuah atanga hma an lak dan tur kawng hrang hrang kawhhmuh turin helaiah cheng nuai

75,000 a dah satliah mai ni lovin SEDP normal fund-ah cheng nuai 30,000 an dah leh te hi a ropui hlein ka hria a. He cheng nuai 30,000 a lo lannaah hian department leh thiamna bik neiten project report te siama a tihhlawhtlinna tur atana ram pawn, foreign thlenga hma an lak theih nan leh chutiang buaipui nan chuan a taka hlenchhuah a nih theih nan normal fund hi dah a ni tihte kan han hmu zel a, hei hi a lawmawm ka ti a. SEDP programme kan kalpui tur hi kan hlawhtling ngei dawn a ni tih hi a langchiangin ka hria a a lawmawm ka ti a, lawmthu ka sawi duh a.

Tin, chu SEDP programme kan han kalpuina atanga a hlawk zia mipuiin an hriat chhoh dawn avanga an hnathawk nasa lutuk kha an nat phah ang tihte pawh kha ngaihtuahna kan hotupa in a nei a nih ka ring a. Chuta tana Health Care Scheme tha tak mai a rawn duangchhuakte hi a ropui hlein ka hria a, cheng nuai 5,000 a han dah belh a. Tin, he Health Care Scheme a taka kalpui a nihna atan doctor leh nurse post fill up na atana cheng nuai 5,000 han dah leh te hi a ram hmangaih thlak ngawih ngawihin ka hria a ni. A lawmawm hlein ka hria a, chuvang chuan, a bu han keu phat atang hian ‘lawmna tur hlir a lo ni e’ ka ti duh a ni.

Chumai ni lovin zirna chungchangah, zirnaah hmasawna a awm a ni tih hriaa zirna ngaihpaawimawhna tura a bik takin elementary level-ah zirtirtu indaihlo puhrukna atana cheng nuai 3,000 a han dah te hi Pu Deputy Speaker, lawmawm ka ti zual a. Keini backward area lam phei khu chu kan lawm leh zual a ni. Tukin zingah chanchinbuah khan a lo lang a, MPSC chungchanga hna lak chungchang an Chairman ten a rawn sawi a. Khalaiah khan ‘Hna kan lakna chungchangah hian kan muangchang lo a ni’ tihte a lo awm a. Amaherawhchu, kan sorkarin tun hunah hian Group ‘B’ Non-Gazetted kha hmanhmawh taka hna lak te a tul avangin sorkar kuta lak let leh te demna te a awm thin a. Hei hi vawiinah hian ka tarlang duh a, Pu Deputy Speaker, kan sorkar kalta khan ka hriat sual loh chuan August, 2017 khan Primary School zirtirtu 100 lakna tur MPSC-ah a pe phei niin ka hria a. Chutah chuan MPSC chuan ni 4th October, 2017-ah advertisement a chhuah hman chauh mai a, sorkarin a pek phei atanga thla 2/3 hnuah. Chutah chuan ni 4th October, 2017-a advertisement a chhuah kha thla 9 a liam hnu ni 19th, 20th July, 2018-ah exam a conduct thei chauh a ni. Chu chu hmanhmawh

taka hna la an ni thei ang em aw ka ti a. Chutah ni 19th,20th July, 2018-a exam a conduct kha written result kha thla 7 liam hnu ni 1st February, 2019-ah result a tichhuak a, personal interview kha ni 13th – 17th March, 2019-ah a nei thei a ni. Chumi awmzia chu 2017,2018 leh 2019 chhungin MPSC hian Primary School zirtirtu 100 a la hman tihna a ni a. Khatiang time table anga kan kal dawn a nih chuan kum 3 chhungin Primary School zirtirtu 100 a la hman a, chutiang chuan vawiinah hian kan sorkarin zirna ngaipawimawha zirtirtu loh theih loha hmanhmawh taka lak a tum 946 nen hian kan khaikhin chuan, 946 la tur hian MPSC tuna an kalphungah chuan kum 30 dawn a ngai tihna kha a ni awm mang e ka ti deuh a. Chuvang chuan kan sorkar hian a tih tur dik tak hi a va ti em! Ram hmangaihna neiin heng kan zirna school, a bik takin Elementary level ah kan indaihlohna te inphuhrukna tur kawng dapin chak takin hma a la te hi lawmawm ka ti a. Chu mai ni lovin keimahni, a bik takin kan bialah pawh ngaihtuahna kan seng a. Area development fund kan tih, MLA Fund kan tih bik hi kei pawhin kan zirna a tlakhniam em avangin 25% tal hi chu zirna bikah hian hman ka tum nghe nghe a, chutiang chuan hma kan la a ni a. Keini hi kan hnufual em em a, nakinah pawh kan la sawi ang a, a buaihlakzia chu Pu Deputy Speaker, he House hian min hriatpui ula ka duh chu sorkar hmasa hmasa leh tuna Pu Zoramthanga sorkar ding hmasa khan SDEO, West Phaileng-ah khuan post a create a, tahchuan tha tak mai min dah sak a, kan lawm hle mai a. Amaherawhchu, kum 10 hnua sorkar a lo din leh khan he SDEO hi a ngaihna a awm lo reng reng, world class education min tiamtute khan kum 10 chhungin 18 an rawn post hman a ni. Chutiang khawp chuan zirna a tlabal tawh a, vawiinah kan House Leader zahawm tak kan Finance Minister ni bawkin a bik takin elementary level-a zirtirtu indaihlo puhruk nan leh zirna hmasawna atana cheng nuai 3,000 budget-a a rawn tarlang hi lawmawm ka ti hle a, lawmthu ka sawi duh a. Tin, a bikin keini khu Centrally Sponsored Scheme matching share neia hnuh chhuah ngaihna hmun area-a awm kan nih avangin sorkar hmasaah khan kan bei a dawng hle a, CSS te hi kan hmu ta manglo kha a ni a. Vawiinah chumi do letna atan matching share cheng nuai 17000 kan budget speech-a a lo lang hi lawmawm ka ti tak zet zet a ni tih ka sawi duh a.

Tin kawng tlabal siamthatna atan cheng nuai 15,000 lo lang te, PWD Road Fund Board-ah cheng nuai 15000 piahlahmah cheng nuai 5000 dah belh a ni te hi lawmawm ka ti a. Kan inkalpawhna kawngte a chhe em em tih kan hria a, vawiinah chak takin he sorkar hian hma han la chho va, tam tak chu hmalakna nei tawh mahse a bik takin keini bial tan chuan lawmna tur hliir a lo ni tih hi a langin ka hria a, he budget speech ah hian lawmawm kan ti tak zet zet a ni tih ka sawi leh duh a.

Tin, ka ngaih pawimawh ve em em thin a awm a, mirethei te te, nitina inhlawhfa thin ang chi te leh Muster Roll-a in hlawhfate chungchanga sorkar hmalakna, minimum wages rate thar tha taka M.R-te tana hlawh pekna tur cheng nuai 8,500 budget speech-a lo langte pawh hi a lawmawm ka ti tak zet zet a ni.

Pu Deputy Speaker, UD&PA-ah hmanni khan Parking House Supports System launching programme-ah kan tel ve a. Hmanniah ka sawi tawh a, han sawi nawn leh duh lai ka nei a, kan House Leader zahawm tak hi thikna leh itsikna nei miahlo a nih zia a langin ka hria a, kan thiante, tawngkam mawilo nilo se la, kan chhiatna duha min bei ngat ngattute pawh kha, a nuai za tel a thlawna an han dawng kha, a semtu kan House Leader zahawm tak hmel ka en khan Isua hmel hmu tlatin ka inhria a, lawmawm ka ti tak zet zet a, chungte chuan minrawn phone a ni. NLUP an sem a, cheng 20,000 emaw, vawkte pahnih/khat lek dawng tur pawhin Congress-a in enroll a ngai thin a, vawiinah hian a lo bo ta zel te pawh hi lawmawm ka ti a, Pathian min hruaina hi kan hotupa kaltlang hian a van nasa em ka ti a.

A tawp berah chuan Pu Deputy Speaker, vawiinah hian budget tha tak mai a bu a an buatsaih bakah, keini ang mi thiamlo tana hriatthiam theih tura Mizo tawng fel fai tak maia an han tarlang hi lawmawm ka ti a, chutih rual chuan nichina member zahawm takin arawn sawi a figure mistake avanga bel lo awm te kha tih awm tak a ni e, inthlanpui kan hmachhawn a, Model Code of Conduct nen kan inchiahpiah luai luai laia khatiang anrawn tihpalh keuh lai lo awm kha chu kan enmil thiam a thain ka hria a, tihsual an nei tlem ngawt zawkin ka hria a ni tih Pu Deputy Speaker, karawn sawi a ni. Ka lawm e.

DEPUTY SPEAKER : Member zahawm tak Pu Lianchunga kha, nichina i lehkhahu rawn lek chhuah kha.. House property-ah i rawn dah leh mai dawn em ni kan ti a ni. Aw le, tunge kan sawm leh ang le, sawi tur kan la awm em? Vawinah hian kan zawh hman loh chuan naktukah tih chhunzawm leh tur a ni a, kan ruahman ang khan, Opposition Group Leader lam te kan sawm tawh mai dawn em ni ? Pu K.T.Rokhaw, member zahawm tak i sawm ang u.

PU K.T. ROKHAW : Pu Deputy Speaker, budget discussion-a thusawi ve thei tura hun tha ka nei hi ka lawm khawp a. He kan budget Finance Minister-in a ruahmanna atanga a lan danah chuan kum khat chhunga kan pawisa hman tur hi cheng vaibelchhe 10692.30 a ni a, hemi atang hian Mizoram-in a tum ve tur hi 10% a ni a, a bak 82.5 hi sorkar laipui atanga sum beisei chu a nih hmel a. Sorkar hnathawk hlawh leh pension te hi, revenue expenditure hi cheng vaibelchhe 8403.52 a ni a, hei hi budget pum pui atanga chhut chuan 78.59% lai a ni ta a ni. Chuvang chuan, hmasawna hnathawhna tur capital expenditure hi a tam thei ta lova, vaibelchhe 2288.78 a ni ta a, chu chu a percent-ah chuan 21.40% vel tihna a ni, a tlem hle a ni. Chuvangin, hmasawna hnathawhna tur development work hi a tlem hle dawn ta a ni. Hemi avang hian kan Chief Minister leh Minister-te hi tan a ngai hle dawn a ni. Kan Chief Minister-in he budget hi chu a chi tur chauh tia he House min thlamuante kha kan rilruah a lian khawp mai a. Pawisa haichhuahna kawngah theihtawp a chhuah kan ring a, kan lawm hle a ni. Tin, helaia ka ngaihpaawimawh em em bik chu Pu Speaker, state sorkar tax lak atanga tum ve tur state owned tax revenue, vaibelchhe 573.69 leh chhiah pawn lam atanga lak luh tur non tax revenue cheng vaibelchhe 459.30, a vaiin vaibelchhe 1032.99 a ni a. Kum hmasa lama chhiah lak thinna thenkhat tihtawp a ni a, zu tax te, lirthei life-time tax te lak a ni tawh dawn lo a. Chumi laia sorkar sum lakluh tur cheng vaibelchhe 225.8- a tihpun a nih tho dawn avang hian sum lakluh dan tur nasa takin dap belh a ngai dawn a ni. Chhiah leh fee a san chhoh hmel a, mipui atanga chhiah lak a ngai dawn tlat niin a lang a, chuvang chuan he budget atang hian mipui dinhmun hi a derthawng tlatin ka hria a ni.

Chuvang chuan he budget hi ka ngaihtuah a, mipui tan chuan lawmna tur a awmin ka hre lova, sorkar tan chuan mipui atanga chhiah a lak loh chuan he

vaibelchhe 225.8 hi mipui atanga chhiah khawn leh a ngai dawn si a, chuvang chuan he budget hi mipui tan lungngaihna budget niin ka hria.

Tin, SEDP-ah vaibelchhe 750 dah a ni a, dah tam viau anga a lan lai hian han bih chian chuan belhchian a dawl lo hlein ka hria. SEDP-a tel awm lo tak sorkar sum hmanna tur pangngaia kal tur, a bik takin district thar 3 tan cheng vaibelchhe 8; tin, doctor leh nurse post ruak hnawhkhahna tur cheng vaibelchhe 50 te, zitirtu indaihlohna phuhruk nan cheng vaibelchhe 30 te, kawng siam thatna tur te, a vaia an dah hi hun ka neih loh avangin vaibelchhe 3083.55 a tling a ni.

Chuvangin budget abstract statement atanga a lan danin normal SEDP atan leh other priority atana cheng vaibelchhe 366.45 chauh dah a nih hi, hei hi SEDP-a dah chu a ni. Kan Finance Minister, kan Chief Minister-in campaign laia a sawi thin, sum faia cheng nuai 3 zel sem tur a tih pawh kha he budget-ah hian a awm lo a ni. A dik tak chuan a beitham hle a ni tih a lang a ni.

Pu Speaker, kan Chief Minister zahawm takin Mizoram leiba a tlakhniam zel chungchanga term hmasaa thawktute, a bik takin Congress Ministry chung a lawmthu a sawina te hi a lawmawm ka ti a. GSDP atanga chhutin kum 4/5 kal ta atang khan, kumtinin leiba hi a tlahniam zel a, tun budget-a kan hmuh ang hian 2019-2020 leiba hi 32.66 percent-ah a tlahniam ta a ni. Chuvangin Congress sorkar kha financial management-ah, sum enkawl naah chuan an lo rin tlak hle a ni tih hemi hian a tilangin ka hria. Chuvang chuan an fakawm ka ti, a dik tak chuan Congress sorkar hunlaia an thil tih a ni.

Tin, vawiina budget sawiho mekah hian thil lawmawm tak chu Gross Fiscal Deficit chu 2.06 percent-ah a tlahniam a, hei hian Congress sorkar sum enkawl thiam zia a lantir a ni. Fiscal Deficit hi .3 percent aia sang tur a ni lova, Congress sorkar kha chuan hei hi a hlen chhuak a ni. Tin, Pu Speaker, hemi te hi hriat ka duh khawp mai a, 14th Finance Commission sum min pek Revenue Deficit vaibelchhe 2716 leh Urban Local Bodies atana vaibelchhe 36.78 leh Disaster Response Fund atana vaibelchhe 18-te hi budget-ah khan a vaiin a kimin a lang a. Mahse State of Taxes chhiah central nena kan insem tur atana 14th Finance Commission report-a a lan danah chuan vaibelchhe 4,769 hi a ni a. Mahse budget-a a lan danah chuan vaibelchhe 3,885.19 chauh a ni. Hei hi a difference hi vaibelchhe 884 a ni. Hei hi a

tlakhniam nachhan hi kan Finance Minister khan nakinah min hrilh thei se ka lawm khawp ang.

Pu Speaker, helaia ka rilru khawih deuh mai chu MNF sorkar tuna a lo din theih nachhan point 2 lian tak chu SEDP nuai 3 chhungkaw tinah kan sem ang tih leh zu kan khap ang tih kha a ni a. Chumi lai chuan SEDP nuai 3 sem tur tih hi he House-ah hian sawi chhuah a ni ta lo a ni. Tin, a pahnihnaah chuan zu kan khap ang tih a ni a, vawiinah hian he SEDP-ah hian Excise Department-ah pawisa pakhatmah dah a la awm lo. Chumi atang chuan an tlinna, an policy lian ber pahnih kha vawiinah hian an theihnghilh ta em ni tih hi ka zawt a ni. Vawiinah hian pakhatmah SEDP pawisa hmanna turah hian Excise hi a lang lo a ni.

SPEAKER : I zo thei tawh em le?

PU K.T. ROKHAW : Ka lawm e.

SPEAKER : Tunge sawi leh ang? Khi a hun a tawp dawn a minute 10 a awm tawh lova, i chawl mai ang u hmiang. Naktukah ti leh ila ti rawh u. A lawmawm e, kan hahdam ni te pawh a awm ve ang chu. A nih aw. Naktuk dar 10:30 A.M. ah kan sitting kan tan leh dawn nia.

Sitting is adjourned. 3:55 PM